



dad d Valencia  
oteca General

92

38





D/92  
38

b1955042x  
c25681584

UNIVERSITAT DE VALENCIA

Biblioteca



80002486681

**DE JURE POLITICO  
DISSERTATIO  
ADVERSUS STATUUM EUROPAE**

HODIERNOS PERTURBATORES ET REBELLES,

SAPIENTUM JUDICIO SUBJECTA.

AUCTORE

**JOSEPHO VIDAL,**

E PRAEDICATORUM FAMILIA, IN VALENTINA  
ACADEMIA SACRAE THEOLOGIAE PUBLICO  
PROFESSORE.

---

**VALENTIAE:  
IN OFFICINA BENEDICTI MONFORT.**

*Anno 1853.*

СВЕДЕНИЯ ОБ  
ОБЩЕСТВЕННОМ

СОСТОЯНИИ ГОСУДАРСТВА  
СОВЕТСКОЙ РЕПУБЛИКИ

СОВЕТСКОЙ РЕПУБЛИКИ  
СОВЕТСКОЙ РЕПУБЛИКИ

R.48.573.

## LECTORI.

*D*e jure politico adversus hodiernos statuum Europae quin et totius etiam orbis perturbatores breviter tractaturus, è re procùl dubio foret expendere, num universaliora humanae cognitionis principia, quae sunt opinionum et sententiarum quasi elementa, sint illis nobisque communia: nemo enim alicujus erroris convincitur, nec persuaderi ei quidquam unquam potest, nisi juxta principia sive axiomata quae profiteatur. Verum quum animadverterem, novos hujus saeculi ideologos haec generaliora axiomata nedùm in dubium vocare, sed etiam eorum absolutam certitudinem, cavillationibus potius quam rationum pondere, obscurare, nimis operosum mihi visum est, rem hanc tam ab ovo sumere. Illud tamen minimè praetereundum puto, novam hanc, quam vocant, ideologiam seu philosophiae φacuitatem,

quae à multis jam retrò annis apud gallos  
viguit, eorumdem politicae inscitiae cau-  
sum extitisse praecipuam. Et re quidem  
vera id injuria pronuntiatum affirmabit  
nemo, qui Vice-Comitem de Bonald scri-  
bentem (*Recherches philosophiques sur*  
*les premiers objects des connaissances*  
*moraes, tom. 1, cap. 1 de Philosophia*)  
legerit, nullum in Galliis designatum esse  
studentibus philosophiae sistema; sed in-  
differenter eisdem indicata tantum quo-  
rumdam scriptorum opera, cujuscumque  
sistematis illi fuerint aut opinionis: Ba-  
conis aequa ac Cartesii; Lockii ac Ma-  
lebranchii; Condillac ac Leibnitii. Jam  
vero ex tali scriptorum ac opinionum va-  
rietate, quid boni sperandum, quodvè  
malum non timendum? Per se patet: ac  
deploranda nimis experientia id ipsum  
confirmat. Nam, quum ex inde desumtis  
ideis praeliminaribus pendeant posteà tam  
politicae quam morales civium sententiae,  
si verè ita se habet illud Bonaldui testimoni-  
um, et in quantum saltem cognitionum  
prima elementa in praedictas sententias  
influunt, non possunt hae non esse va-  
riæ, confusæ ac perturbatrices, si va-  
riæ etiam sunt ac inter se oppositæ priores  
illæ, à quibus procedunt. Verbo: multa

▼

*et opposita admittere cognitionis principia,  
idem fere est, ac habere nulla; et lati-  
simam aperire portam ad manifestissima  
quaeque in dubium vocanda. Testis sit  
ipse Bonaldius, qui ait: hoc etiam certi-  
tudinis generale principium, nullum in  
mundo esse effectum sine causa, in du-  
bium à multis serio revocatum esse.*

*Neque tamen aequam opinandi liber-  
tatem tollimus; sed quod Doctor eximius  
in religiosis quaestionibus exigebat: in  
necessariis, scilicet, unitatem, in dubiis  
libertatem, in omnibus charitatem servan-  
dam: ea ipsa nos etiam in politicis flagita-  
mus. Atque sicut privatae civium rationi  
necessarium esse ducimus, nonnulla in-  
concussa principia seu axiomata pree-  
supponere, ad veras exinde eliciendas  
consequitiones, ita etiam expedit com-  
muni rerumpublicarum rationi, commu-  
nia similiter quaedam principia admittere  
et revereri, unde eorumdem politicus ordo  
et legislatio emanet: tūm ut ex veris le-  
gibus vera itidem unitas et ordo consistant;  
tūm etiam ut, iis multitudine indubitanter  
innixa, facilius in suis officiis continea-  
tur. Hodierna studiorum methodus, ab  
optimo Rege nostro Ferdinando praescri-  
pta, Codicem Partitarum, et Summam*

*theologicam Divi Thomae Aquinatis foelicitè inter alia explicanda ac illustranda designat.*

*Huic ergo, quod et hispanum appellare lubet, doctrinae studio ac iudicio inhaerendo, et, rejectis ideologorum futilibus subtilitatibus, aequivocam aut obscuram hucusque efformatam ideam naturae et originis societatis humanae, exili licet ac tenui, quo polleo, et ingenio et dicendi genere, breviter discutiendam suscipio: et contra eos qui eam humanae institutionis, et pacto tacito vel expresso fundatam dicunt; et contra alios illustiores certè ac prudentiores, qui negantes, vel saltem non admittentes democraticas et anarquicas consequutiones, ex doctrina pacti socialis deductas, earum nihilominus radicem, nescio qua erga communem scriptorum juris naturalis ac gentium sententiam observantia aut honore irretiti, veriti sunt abscindere. Quapropter ne horum, meritò adquisita bona existimatio, gravius fortassè rebus publicis detrimentum pariat, radicem hanc ex quorumcumque scriptis, et communiter ab omnibus utendo receptis principiis, evellere statui. Ad rem.*

## DE JURE POLITICO.

ARTICULI PRIMI,

CAPITIS SECUNDI,

*Ethicae particularis Francisci Jacquierii: de societate in genere et juris politici origine, illustratio atque emendatio.*

I. Statum civilem inventum humanum fuisse, statuque naturali, in quo homines omnino liberi et aequales fuerunt, multò posteriorem, communis juris naturalis ac gentium scriptorum et recentiorum fere omnium philosophorum fuit errori obnoxia sententia: à plurimis etiam aliis auctoribus, bona procùdubio fide ac judicio caeteroquin praeditis, amplexata. Hos inter reçensendus etiam Jacquierius, qui de hominis officiis in sua Ethica particulari agens, ea in primo capite, quatenus homo sui juris est nulliche auctoritati subjectus, considerasse se, ait, de iisdem, eo in societate jam constituto, in

secundo acturus. Verum ii deplorandas consequenties quas exinde pronum erat, ut superbia aliquique inordinati hominum affectus elicerent, non animadverterunt. Cumque tumultus ac perturbationes, quibus his temporibus fere omnes Europae respublicae commoventur, earumque iniunxens communis ruina et labes, illarum consequentionum effectus sint, ad societatis humanae generatiū sumptae originem et naturam penitus investigandam ac introspectiendam, et ejusdem societatis bonum commune, et publici doctoris susceptum munus, nos cogunt. Triplici conclusione, ut brevitati et studentium captui consulamus, id efficiemus. In prima, societatis humanae originem, argumentis et à ratione et ab auctoritate petitis, statuemus: in altera juris politici, quod ejusdem societatis vinculum ac nexus est, existentiam et naturam definiemus; in tertia, de legibus civilibus earumque obligatione aliquid strictim tractantes, ea quae tironibus scitu magis necessaria sunt attingemus. Verum sunt quaedam antea

### PRAENOTANDA.

II. 1º Ut omnis ambiguitatis tollatur occasio, terminorum aut vocum, quibus praesens quaestio continetur, sensus explicandus est, ne

*logomachia* inutiliter laboremus. Atque in prius quid per hominis naturam , essentiam aut statum naturalem ejus intelligatur , constitendum. Essentia aut natura hominis definitione comprehenditur , quæ , aut phisicae , eam considerando , dicimus , compositum eum esse ex anima intellectiva et corpore , aut dum , metaphysicæ sumendo , asserimus , esse animal rationale. Verum quocumque modo homo aut ejus natura in ejusdem tractatione sumatur , certum est , de homine in communi sive in abstracto sermonem iniri , non de eo quatenus individuum est , et ut in rerum natura et extra mentem et causam existit.

Natura autem humana in communi sive in abstracto considerata eadem quidem est in omnibus hominibus ; eoque modo sumpti homines aequales certè sunt. Nullibi verò existere potest illa , nec alicujus alterius substantiae natura , nisi iis conditionibus sociata ac determinata , quibus individuum aut suppositum consistat. Unde homines quantum ad eorum naturam in abstracto sumptam omnino aequales sunt ; sed eo sanè modo nunquam extiterunt nec existere potuerunt ; sed prout individui tantum , et ut realiter in mundo existunt : quo certè modo sunt inaequales. In opusculo vulgari lingua conscripto , cui titulus est : *Origen de los errores*

*revolucionarios de Europa y su remedio*, id, et universum sistema politicum, quod hac Dissertatione summatim comprehenditur, fusius explicatur. Tom. I, à pag. 121, num. XXV et XXVI, cap. II.

III. 2º Cum hominis praetereà natura non solum corpore sed anima etiam aut mente et ratione constet, naturale homini dici potest, et quod ei convenit ex parte corporis, et quod ex animae et secundum rationem. In iis autem quae ad societatem et ordinem moralem spectant, illud tantum dicendum est homini naturale, quod ei convenit secundum rationem; qua liberi est arbitrii, et caeteras omnes substantias corporeas supereminet. Nisi enim in hoc sensu sermo accipiatur, multa quasi naturalia recenserentur, quae rationi, quae praecipuum est humanae naturae constitutivum, minimè cohaerent.

IV. 3º Pro certò etiam habendum est, primum hominem non à se ipso tò esse acceptisse. Quod enim à se ipso esse accipit, sive quod est causa suae propriae existentiae, existit necessario; adeoque semper; quod de homine, ostendetur modò, affirmari non posse. Neque ab alio creari idem homo potuit quam à Deo. Omne enim ad ejus productionem potentia cuiuscumque causae creatæ se extendit, ex materia praexistenti constare debet, ex qua educatur;

quod de anima hominis, quae est immaterialis et praecipua ejusdem hominis pars, dici nequit. A solo ergo Deo creatus est homo.

V, 4º Praesupponendum etiam est, hominem non semper extitisse; idque triplici probatur ratione. Prima, quia ad ejus naturam pertinet actu existere per generationem; atqui quod per generationem incipit esse, non potuit semper extitisse. Quod enim per generationem existit, posterius est tempore, non solum generante, sed etiam sufficienti ipsius ad generandum aptitudine. Neque necessaria est tantum haec temporis posterioritas, ut, claritatis gratia, scholae verbis utiamur, unicuique hominum singulatim sumpto; sed et universo humano generi in communi; quia numerus non est nisi qualitas aut accidens rebus numeratis extrinsecum; et quod alicui individuo convenit essentialiter, convenire etiam debet omnibus ejusdem speciei individuis. Alia ratio cur homo non potuit semper extitisse, est, quia, si semper extitisset, quum anima ipsius sit immortalis, infinitus earum numerus nunc remaneret, quod est absurdum; quum nullum detur infinitum actu nisi solus Deus. Tertia ratio, quae opponitur existentiae humani generis ab aeterno, est, quia quum hominis generatio tempore commensuretur, infiniti in ea hypothesi praecessissent menses et anni: et illi

his aequales fuissent; cùm non possit unum infinitum esse majus alio. Hoc autem repugnat illi evidenti ac vulgato axiomati, quod ait: *Totum est majus sua parte.*

VI. 5º Sed neque solitarius creatus est, hoc est, unicum in sua specie individuum. Si enim talis formatus fuisset, multiplicari nullo modo potuisset; quum ad cujuslibet alterius productionem duae personae requirantur, masculus, scilicet, et foemina, seu pater et mater. Omnis enim alia quaecumque hominis productio diversa à communi et à nobis cognita generatione, ut deliramentum insipientium rejicienda est, quae nullam refutationem meretur. In societate igitur conjugali, à Deo ipso immediate constituta, creatus est homo. His autem positis sit

## PRIMA CONCLUSIO.

*Publicae societatis statum homini naturalem esse, in eoque fuisse jam à Deo primos homines constitutos, et ratio naturalis, et sacrae Scripturae documenta evincunt.*

### PROBATIONES A RATIONE SUMPTAE.

VII. 1<sup>a</sup> Tām societas conjugalis quām domestica seu familia homini naturales sunt, et ad generis humani conservationem necessariae; atqui, ut ipsae etiām conserventur et suum assequantur finem, juxta praescriptum legis naturalis et rectae rationis, debent legibus societatis publicae subjici, ab iisque gubernari, ergo. Major deducitur evidentē ex praenotatis, et à nemine negari potest. Minor autem non est minūs certa: quum enim in nullo rerum genere possit permanere et stare ordo inferior et particularis, nisi superiori et universaliori ordini subjiciatur, et tām ordo conjugii quam familiae sit ordo particularis et quasi individuus, hoc est, publicae societatis ordini et directioni subordinatus, nec societas conjugales, nec domesticae seu familiae potuerunt unquām conservari, et juxta

praescriptum legis naturalis convenienter dirigi, nisi alicujus publicae auctoritatis directioni subjectae. Leges, quibus in omni benè constituta republica tam conjugum quam familiam constituentium jura ac officia mutua statuuntur ac proteguuntur, id luculentè ostendunt. Nec iis, aut conjugibus aut familiam constituentibus, cujuscunque conditionis extiterint, repugnare unquam lieuit. Quod si aliquis hominum esset status, in quo hujusmodi leges contemnerentur, non in eo unitas aut societas, sed anárquia et societatis dissolutio existeret. Adeo siquidem evidens est, in omni societate aut statu necessarium esse ordinem, ut ii ipsi rebelles ac statuum perturbatores, qui illum hodiè in Europa evertunt, non nisi ordinem et legum observantiam in ore habeant, idque revera cupidissime expostulent; sed eum tamen praeposterum ordinem eamque legum interpretationem et observantiam volunt, quae illorum imaginationi, libidini, instabilitati, privatisque aliis cupiditatibus affectibusque conveniat. Videlicet, id demum flagitant, ut in populis eorum ratio praevaleat; ab iisque, qui ex privata conditione publicis imperantibus obedire debent, respublicae teneantur: quod non nisi in earum perturbationem ac exitium redundare potest.

VIII. Dicet fortassè aliquis cum Jacquierio,

benè quidem haec omnia se habere, postquam apud homines sunt respublicae constitutae; non verò ab initio et sub regimine patriarchali, quando tam familiae, seorsim sumptae, quam singuli homines unamquamque familiam constituentes, naturali gaudebant libertate; ita ut uniuscujusque actiones ab alterius voluntate non penderent. Dein veò nulla dubitatio esse potest, quin ad tuendam pacem servandamque communem utilitatem, unum elegerint illae familiae, qui gubernandis crescentibus illis magis idoneus judicaretur. Respondetur enim, non solum fictitiam esse praedictam libertatem naturalem, sed et ipsi etiam legi naturali et rectae rationi contrariam. Quin immò et doctrinae, quam in response ad prima objectionem idem praecitatus auctor affert, parùm est consona. Si enim à primis mundi temporibus viguit societas paterna, in qua parentes erant filiorum principes naturales et politici, neque ullum erat tunc pupillaris majorisque aetatis discriminem, ut ille ait, nec ulla profecto unquam fuit apud homines libertas naturalis, qua unius actionis ab alterius voluntate non penderent; sed filiorum actiones parentum suorum directioni semper subjici debuerunt, si ii illorum tunc erant principes naturales absque ullo inter pupillarem majorisque aetatis discriminine. Ex recta siquidem ratione et

lege naturali jus competit parentibus, filios educandi et dirigendi. Dicendum igitur est, primum hominem, primum Principem in mundo fuisse, primum Magistrum, et primum adeò etiā Legislatorem; cuius praeceptis, quae, in quantum bonum publicum respiciebant, verè et propriè primae mundi leges fuerunt, et conjux ipsa et filii subjici debuerunt; et non quidem tacitò aut proprio illorum consensu, ut male hic auctor adjungit, sed quia id evidentè et lex naturalis et recta ratio semper praescripsit. Näm et necessario certum est, eos qui nihil adhuc sciebant, à primo Magistro in omnibus edoceri et gubernari debuisse, et à nullo alio communis doctrina et publicum hominum regimen derivari in alios homines melius potuit, quam ab eo qui fuerat à Deo electus.

IX. Verum quidem est, tempus quod à primo homine ad olimpiadas usque graecorum esfluxit, valde obscurum fuisse, ut quid tunc magis apud homines invaluerit, neutquam nobis nūnc clare innotescat; cum nulla illius aetatis extet historia nisi sacra, quae, cum philosophis agendo, et non nisi naturali rationis lumine ductis, à nobis in hac probatione praetermittenda videntur. Sed quocumque tandem fuerit primis illis temporibus publicum hominum regimen, necessario tamen verum est, legitimum

illud, vel illegitimum esse debuisse. Legitimum fuit, si ad praescriptum ordinationum publicarum, à primo homine ac legislatore editorum, fuit constitutum; illegitimum, si contra ejusmodi ordinationes fuit inventum. Et primitivae etiām familiae, quae absque ullo fundamento et contra naturalem ordinem supponuntur liberae et nulli alieno imperanti subjectae, aut verè tales erant, aut non. Si liberae fuerunt et independentes, totidem fuerunt publici status, nationes aut populi. Si primo homini, aut alicui alio ejusdem successori subditae, non erant liberae; sive nunquā extitit illa libertas, quae à politicis perturbatoribus hodiè naturalis audit.

X. 2<sup>a</sup> Dei perfecta sunt opera; atqui societas naturalis et non politica, in qua homo quilibet suarum actionum foret supremus arbitrus, non modò non esset perfecta, sed valde imperfecta ac inordinata, utpotè confusione ac perturbatione plena: ergo non illa hominum societas libertatis ac aequalitatis, quae naturalis male à Jacquierio vocatur, et in rerum primordiis extitisse supponitur, sed politica et civilis, in quā sublimioris potestatis nūnc ordo servatur, à Deo est instituta. Et certè quum in praesenti hominum statu maxima eorum pars cupiditatis impetu māgis quam rationis et veritatis ductu

feratur, et nulla probabilis ratio naturalis occurrat, qua indicari possit, illos non semper tales extitisse, remedium, quod adversus gravissimum hoc malum in societate civili supremaque auctoritate nunc adest, eamdem cum hominibus habere debuit antiquitatem, et à Deo ipso, eorum omnium sapientissimo Proviseore, institui et ordinari.

XI. 3<sup>a</sup> Terra et omnia quae in ea sunt, ad hominis sustentationem et usum sunt à Deo creata; atqui multa in suis visceribus ipsa continet et producit ei utilissima et necessaria, sive ad vegetabilium genus spectent, sive ad animalium, sive ad mineralium, quibus frui non potest, nisi in statu publicae societatis constitutus: ergo. Major est evidens, atenta hominis suprà omnes creaturas corporeas perfectione. Minor autem probatur. Quum enim omnia illa non in qualibet plaga et sub omni coeli temperie tellus edat, sed in variis ac saepè dissitis ejusdem locis; et homo non in multis, sed in aliquo tantum eorum habitare contingat, illis profecto bonis aut remediis frui non potest, nisi commercii ope; quod sanè non viget sine publica societate. Aliquis enim legibus illud subdi debet, quae supponunt et spectant ad publicam societatem. Publicae igitur societatis status est homini naturalis.

XII. 4<sup>a</sup> Ex quo homo à Deo est creatus, signata in ejus est mente cum recta ratione lex naturalis, quae non est aliud, nisi participatio legis aeternae in humana creatura; atqui à lege naturali necessario emanat in hominibus, sicut radius à sole, status publicae societatis, ergo. Prob. min. Prima splendentia principia legis naturalis sunt: *Quod tibi fieri non vis, alteri ne feceris; facque aliis quod tibi vis ut alii faciant et alia similia;* undè procedunt officia tūm perfecta, tūm imperfecta quae aliis debemus hominibus, quae quidem communem societatem cum illis exigunt et supponunt. Adeo autem id verum est, ut posteriorum horum temporum juris naturalis scriptores plurimi, maximè qui Pufendorfii sistema secuti sunt, ordinem naturalem rerum invertentes, jus naturale à societate seu *socialitate* sumendum esse statuerint. Hoc est, solem à radio nasci crediderunt; quod tamen aperte est falsum, quantumvis hanc nostram conclusionem aliundè confirmet.

*Probationes ex sacra Scriptura depromptae.*

XIII. 1<sup>a</sup> Deus creavit hominem ad imaginem et similitudinem Trinitatis; atqui haec imago et similitudo Trinitatis ad hoc maximè

extenditur, ut in publica societate vivat, ergo publicae societatis status est homini à Deo praescriptus et naturalis. Major est Gen. cap. 1, vers. 26, ubi dicit Deus: *Faciamus hominem ad imaginem et similitudinem nostram*, per quae verba *faciamus*, et *nostram* intelligent communiter sancti Patres Trinitatem Personarum. Minorem autem probat ipse Christus Dom. pro omnibus hominibus Patrem orans, apud Joann. cap. XVII, v. 21, per haec verba. *Ut omnes unum sint, sicut tu Pater in me, et ego in te, ut et ipsi in nobis unum sint: ut credat mundus, quia tu me missisti. Et ego claritatem, quam dedisti mihi, dedi eis: ut sint unum, sicut et nos unum sumus.* Hoc est, dedit hominibus Christus claritatem gloriae adoptionis filiorum Dei, ut sint unum fidei et charitatis vinculo, quemadmodum Pater, et Verbum, et Spiritus Sanctus unum sunt identitate naturae. Neque haec charitas, qua ex voluntate Dei debent homines esse unum, impletur satis actibus internis, qui possent perfici extra societatem; sed utriusque generis requiruntur actus, interni, et externi, dicente Joanne, Ep. 1<sup>a</sup>, cap. 3, v. 18. *Filioli mei, non diligamus verbo neque lingua, sed opere et veritate; et etiam: qui habuerit substantiam hujus mundi, et viderit fratrem suum necessitatem habere, et clauerit*

*viscera sua ab eo; & quomodo charitas Dei manet in eo?* Charitas ergo Dei, qua debent homines conformes fieri imagini Filii sui, et inter se esse unum, officia benevolentiae et misericordiae erga alios exigit: pauperibus subveniendo, infirmis juvando ac ministrando, afflictos consolando, errantes corrigendo, et alia similia benevolentiae signa praestando: quae societatem quidem publicam supponunt, efficiunt et fervent.

XIV. 2<sup>a</sup> Status multorum hominum ac familiarum, quibus Reges praesident et publicè imperant, est status publicae societatis; atqui talis hominum status est status naturalis, utpote à Deo institutus, ergo. Prob. min. Prov. cap. 8, v. 15, ait Deus: *Per me Reges regnant, et legum conditores justa decernunt. Per me Principes imperant, et potentes decernunt justitiam.* Eccli. cap. XVII, v. 14, scribitur: *In unamquamque gentem praeposuit rectorem.* Et Rom. cap. XIII, v. 1<sup>o</sup>, ait Apostolus: *Omnis anima potestatibus sublimioribus subdita sit: Non est enim potestas nisi à Deo: quae autem sunt à Deo ordinatae sunt.* Ordinatae, inquam, non quidem remotè et mediaè, ut nonnulli interpretantur, ajentes, publicae societatis regendae auctoritatem Deum populis aut nationibus immediatè tradere; per horum autem

voluntatem in Reges aut Principes eamdem auctoritatem transmitti. Non enim dicitur Deus propriè aliquid efficere , aut illarum rerum propriè eum esse auctorem , quae homo , proprio marte et solertia ductus , adinvenit et exequitur; quantumvis illa, non nisi voluntate et ratione à Deo accepta, perficiat. Eo namque modò omnia humani ingenii inventa et artefacta Dei instituta essent: quum nihil horum homo agat, nisi quia vult , et ratione ad ea disponenda dirigitur. Sed cum sacra Scriptura , de supremae humanae potestatis origine verba faciendo , ordinem societatis , hoc est , auctoritatem imperandi in sublimioribus potestatibus et obligationem obediendi in subditis, ipsi essentialē , à Deo esse affirmat, propriè id et immediatè Deo convenire , ipsam edocere , intelligendum est ; quandquidem non id ad executionem gubernationis, quam Deus mediantibus aliis causis perficit, pertinet, sed ad ipsam communem gubernationis rationem ; de qua dicit Gregorius ( apud S. Thomam, 1<sup>a</sup> Part., Quaest. 22, art. 3: *Mundum per se ipsum regit, quem per se ipsum condidit.* Status ergo et ordo publicae societatis, humani generis conservationi et perfectioni necessarius , à Deo est institutus et ipsi homini naturalis.

XV. 3<sup>a</sup>. Prima familia, ex qua universum

genus humanum manavit, à Deo creata est, ut cresceret, multiplicaretur et replete<sup>r</sup> terram (Gen. 1, v. 28), atqui praestare id non poterat, nisi simūl esset societas publica, ergo. Prob. min. Praestare id non poterat sine jure coercendi eos, qui eidem multiplicationi ac propagationi obstarent, ipsosque, dūm opus fuisse<sup>t</sup>, morte plectendi; quod tamen non competit nisi societatis publicae summae Potestati: status ergo publicae societatis homini naturalis est, in eoque fuerunt jām à Deo primi homines constituti.

XVI. 4<sup>a</sup> Et re quidem vera prima hominum societas post diluvium, octo animabus constans: Noë, scilicet, cum uxore sua, tribusque filiis, cum suis uxoribus, naturalis fuit, à Deo constituta, atque ad genus humanum propagandum ab universal<sup>i</sup> exitio servata; atqui haec prima omnium societas, non solum fuit societas domestica seu familia, sed etiām publica seu civilis, ergo. Major à nemine, ut puto, negabitur. Prob. min. Jus vitae et necis non nisi societati publicae, aut summo in unaquaque republica imperanti, convenit; atqui hoc jus commisit ipse Deus primordiali illi societati, ergo. Major est certa. Sic tamen probari posset, si negetur. Unicuique societati aut ejus praeposito non competit aliud jus, quam, quod ejusdem

societatis finis et objectum exigit; atqui finis et objectum societatis domesticae seu familiae, quod est conveniens educatio filiorum, non exigit tale jus: quod nec benè aliunde cum paternali amore ac benignitate componitur; sed ad publicum externum ordinem servandum tantum requiritur, ergo. Prob. autem min. Gen. IX, vv. 1 et 6, haec leguntur. *Benedixit Deus Noë et filiis ejus, et dixit ad eos: crescere et multiplicamini, et replete terram.... Quicumque effuderit humanum sanguinem, fundetur sanguis illius; ad imaginem quippe Dei factus est homo,* ergo primordiali in mundo post diluvium societati, ex praecitatis octo individuis compositae, commissit ipse Deus jus vitae et necis. Sive ergo sumatur haec prima humana societas tanquam domestica seu familia, sive tanquam publica et civilis, eo quod ex quatuor conjugiis erat conflata, certum semper est, Deum immediatè et per se ipsum, toti ei fuisse allocutum; delicta ejus tamen publica, quam privata condonasse; quasi pactum aeternum cum omnia pepigisse; legesque demum ad ejusdem conservationem et propagationem accommodatas, prescripssisse: quod propriè ac perfectè est statum politicum seu publicum constituere. Constat igitur ex sacra Scriptura, publicae societatis statum hominai naturalem esse, in eoque fuisse jam à

Deo primos homines constitutos. Atque nisi ho-  
dierna publicae societati hanc divinam origi-  
nem tribuamus, jus vitae et necis, quod ad  
eiusdem conservationem et ordinem est necessa-  
rium, et ab hominis consensu nequit oriri, ei  
non competet.

XVII. 5<sup>a</sup> Superaddi etiā posset his qua-  
tuor probationibus alia quinta ex infirmitate sive  
fundamenti destituzione, qua laborare videtur  
sententia opposita, desumpta. Quaeri enim potest  
ab ejus defensoribus: *Ubinām*, et quandō in  
mundo viguit status anarquichus primitivus, hoc  
est, status multarum familiarum ab invicem  
independentium et liberarum? Fatebuntur illi  
namque, se nescire: quandōquidem certò illis  
non constat status politici primitiva erectio.  
Verum nullam dubitationem esse posse, fortassè  
cum Jacquierio reponent, quin, *crescente ab*  
*initio familiarum numero* (*Philosoph. moral.*  
*part. II, cap. II, art. I,*), *familiae illae ad*  
*tuendam pacem, servandamque communem*  
*utilitatem, pro sua naturali libertate, unum*  
*elegerint, qui gubernandis crescentibus fami-*  
*liis māgis idoneus judicabatur.... totamque*  
*auctoritatem vel ei tantum vel pluribus detu-*  
*lerunt.* Quod tamē nos non tam dubitandum,  
quam omnino rejiciendum hac Dissertatione con-  
tendimus: libertatemque familiarum separatarum

et independentium, quae status seu respublicas per se non constituant, non modo non naturalem, sed fictitiam esse, ratione et auctoritate evinci. At, quum ea doctrina fere generalem scriptorum approbationem fuerit adepta, lectori tantummodo nostram hanc opponimus, ut, si forte eam ad statuum perturbationes fraendas existimat accomodatiorem: qualemcumque probabilitatem ipsius argumenta continere videantur. Et si quidem rem hanc ab ovo sumimus, praedictaeque approbationis primam causam volumus investigare, haec nobis probabilis fortasse videbitur: eos qui hucusque hanc quaestionem magis ex proposito politicè tractaverunt, sacrae Geneseos Scripturae, quae antiquissima omnium est, et de qua posteriores omnes, etiam ethnici, de rerum exordiis sua meliora acceperunt, non tam sensum quam litteram respexisse. Inde enim factum est, ut, quum nullum mundi regnum in ea nominetur ante Nimrodum, nec Adamum, nec Noachum, nec ullum alium tanquam reges habuerunt; sed statum publicae societatis seu politicum, veluti ab aegiptiis aut graecis, et circa praedicti quidem Nimrodi aetatem, inventum, censuerunt. Regnandi etiam officium, quasi ex vi aut superbia ortum, ab ejusdem ministerii sanctitate separare nescierunt. Quod miti non modo cum ratione, sed

cum ejusdem Scripturae sensu pugnare videtur.

XVIII. Atque in hanc sententiam praecipue adducor ex consideratione perfectissimi ordinis, quo divina Sapientia hominem condidit: qui et in statu etiam innocentiae aliis dominatus fuisse (D. Thom. 1. part. quaest. 96, art. 4, et quaest. 94, art. 3,), et adeo perfectus primus formatus est, ut alios posset instruere et gubernare; quam gratiam sine causa accepisset, nisi re ipsa instruxisset eos ac gubernasset. Unde per illa *omnia*, de quibus legitur, Sap. X, v. 2. *Dedit illi virtutem continendi omnia*. Gr. Εδωκετε αυτοις τιχην κρατησαι απαγωγη, intelligenda puto tam ratione destituta quam ratione praedita: quum eodem verbo utatur idem sacer Scriptor, ubi de Regibus ait: Cap. VI, v. 3. *Praebete aures vos, qui continetis multitudines*: Gr. Ενωτισασθε οι κρατουντες πληθος. Est enim κρατειν imperium ac potestatem in aliquos habere: unde κρατος et κρατησις pro dominatione ac imperio sumitur. Secundum item mundi hominem, Cainum, fuisse etiam Principem, sive legitimum, sive illegitimum, innuere quoque videtur ipsa Scriptura, quae ait, *aedificasse eum civitatem, vocavisseque nomen ejus ex nomine filii sui, Henoch*. Civitas autem, qualiscumque ea sit, sine jure civili publicaque in ea potestate, non subsistit: quum eo nomine non designetur

nisi stabilis habitatio complurium familiarium consociatarum, sicut *domus* nomen unius tantum familiae habitationem significat. Nec minus pariter indicatum arbitror in eadem sacra Scriptura secundi mortaliū omnium Parentis, Noachi, imperium. Certum enim videtur, ante dispersionem noachidarum, unam extitisse, ex illo enatam, societatem publicam, nationem aut populum, dicente Domino: Gen. XI, v. 6. *Ecce unus est populus, et unum labium omnibus:* cui non nisi ipse existimandus est, juxta S. Philastrium infrà citatum, divisisse orbem ac prae- fuisse; et à quo Nimrodus paulò post, rebellando, defecit. *¶* Ubinam ergo, et quandò in mundo viguit illa multarum familiarum naturalis libertas? *¶* Ubinam, et quandò extiterunt familiae disjunctae, quae inire posteà publicam societatem elegerunt?

XIX. Objic. 1º contra primam conclusionis partem. Ille societatis status non est naturalis nec à Deo institutus, qui non semper in mundo viguit; sed quem hominum malitia aut communis ipsorum utilitas, quasi necessarium, tempore procedente, fecit; atqui sic se ab initio res habuit, ergo. Prob. min. Quum enim naturalis ratio demonstret, homines natura esse aequales et liberos, ita ut actiones unius ab alterius voluntate non pendeant, probabile est, primitivarum

familiarum filios adultos et aetate proiectos, tacito veluti consensu, patriae potestati mansisse subjectos, eamdemque, cum qua nati erant et creverant, auctoritatem agnovisse; ipsarumque familiarum dein crescente numero, unum aut plures elegisse, qui gubernandis omnibus magis idoneus judicaretur, ergo. Resp. neg. min. et ejus probationem. Ut enim supra dictum est, fictitiae omnino sunt praedictae primitivi hominis, qualitates aequalitatis et libertatis. Et quod ad aequalitatem quidem spectat, adeo id est evidens, ut oculis etiam corporis veluti pateat, et per quam modico rationis lumine omnium mentibus innotescat. Nam maxima inaequalitas, quae hodiè in statu civili apparet, et de qua adeo vehementer conqueruntur constitutionum politicarum reformatores, aliundè provenire non potest, quam ab ea quae supponitur, et existit, in statu, qui ab iisdem naturalis vocatur. Nec minus etiam est manifestum, fictitiam pariter esse libertatem publicam, qua homines primitus potitos fuisse, multi credunt. Immò nunquam minus talis libertas apud homines existere potuit, quam in illorum primordiis, de quibus affirmatur. Quum enim tunc maximè genus humanum conservari et multiplicari deberet, ad quod aliquis societatis publicus ordo requiritur, nunquam minus existere potuit illa libertas,

quae omnem externum ordinem in hominibus excludit, quam ab illorum origine. Quis enim sibi persuadeat, sapientissimum omnium Conditoris adeò humani generis negotium in prima sui institutione neglexisse, ut illud publicè inordinatum perturbatumque relinqueret, quandò communi et publico ordine màgis indigebat? Quia et nos cum arbusta plantamus, tamdiù in eis majorem operam diligentiamque impendimus, quoadusque ea jàm in terra coaluisse videntemus: et si semèl radices egerint, eorum solicitudinem curamque abjicimus. Primus ergo homo, qui omnium pater et magister à Deo fuit constitutus, naturali potiorique jure, quam qui postea civilia in mundo obtinuerunt imperia, filiorum nepotumque suorum fuit etiàm princeps et dominus. Adultos eos et in aetatem proiectos eamdem, cum qua nati erant et creverant, auctoritatem agnovisse, credendi sunt. Et non quidem proprio illorum consensu sive tacito sive expresso; sed quia ità illis lex naturalis praescribebat, ordoque societatis, recentè tunc editae, deposcebat. Quemadmodùm et hodiè qui ubicumque adultam atingunt aetatem, illi Principi manent subjecti, sub cuius ditione nascentur et crescunt. Quumque obscurissima nobis sint illa primitiva et antiquissima tempora, hoc est, quod videri probabilius potest, sive ad

perfectissimam Dei providentiam , sive ad valde nobis notam hominis conditionem attendamus . Quae his minus consona supponuntur à multis , nullo satis probabili nituntur fundamento ; aut istud illi afferant et exponant , ne à nobis tanquam gratis confictum jure ac meritò habeatur .

XX. Objic. 2º cum Heineccio ( de jqr. nat. et gent. lib. II, cap. VI, §. CX., ). Narrat Herodotus , Hist. lib. III , pag. 124. Quod quum persarum principes consulerent quondam de re publica instituenda , et forma popularis aut democratica , quae Otani , potenti cuidam , placebat , caeteris displiceret : quumque , neque praeesse ille cupiens neque subesse , postulasset , ut suo jure tamen ibi liceret vivere , permissum id ei fuisse ; etiam postquam monarchica reipublicae forma fuit à caeteris amplexata : indèque factum esse , ut sola haec Otani familia inter persas in statu naturali viveret , nulli mortalium obnoxia . Populos autem decernere debere , qualè futurum sit suum politicum regimen , confirmat etiam romanae reipublicae institutio . Ut enim refert Dionisius Halicarnaseus , auctor *politicissimus* ( Antiq. Rom. lib. II, pag. 80, ), quum Romulus vocata concione , populum rogasset , ecquam reipublicae formam reliquis anteferendam existimarent , monarchicam etiam elegerunt , regiam potestatem eidem Romulo deferentes . Ex

quibus hoc videtur elici argumentum. Ille status non est homini naturalis, nec à Deo institutus, quem homines non assumunt, nisi, vel consensu ultroneo, ubi primum ac praecipuum *partum* praecedere debet, nempè, quo omnes consentiunt in rem publicam aliquam constituerandam, et aliud item in quo decernant iidein, qualè futurum sit suum regimen: vel vi aut coactione aliqua interveniente; atqui sic se habere statum publicae societatis seu statum politicum, praedicta et alia innuinera documenta historica ostendunt, ergo &c.

XXI. Resp. nego suppositum. Videlicèt, quod homines non sunt jàm in statu societatis, antequàm illum assumant aliquo ex modis praeditis. Homo fuit à Deo constitutus in societate, sicut piscis formatus in elemento aquae. Et sicut iste conservatur in quacumque aqua naturali, sive maris ea sit, sive fluvii aut lacus, et sive in ea nascatur, sive in eam projiciatur, aut in eamdem sua sponte prosiliat, tantò verò melius, quantò illa sit salubrior et purior: ità quoque homo, ex quo ejus ratio societatis beneficio expedita facta est, et ad dirigendum prompta, in eadem societate permanere debet, nec ei licet ipsius legibus repugnare, eo quod legis naturalis necessaria sunt documenta. Potest benè quidem ab una particulari societate in aliam, sive

ab uno societatis genere in aliud transire aut trahi , sicut piscis à mari in lacum aut flumen permeare aut projici : ut autem licet id fiat, et status ab eo assumptus sit legitimus , opportet , ut ad illum recta ratione sit ductus ; sine qua nihil in mundo morali est legitimum et naturale.

XXII. Malè igitur ab Heineccio afferuntur praedicta exempla , quae circā societas particulares versantur , ad probandam originem totius societatis humanae generatim sumptae ; non solum quia ex particulari non sequitur universale , sed quia ex secundariae aut derivatae rei cujusque formatione ferri multò minus judicium potest de formatione primariae ejusdem aut alterius rei in eodem genere . Alind et valde diversum est judicium aut consequentia , quae ex praecallatis exemplis mihi elicienda videtur ; et est hujusmodi : ergo antiquissimi jam sunt in mundo homines rebelles et seditiosi , qui , subjectionis suis principibus debitae jugum extuentes , et dominandi cupidine vehementer incensi , status suos perturbaverunt : rapinis eos , caedibus , aliisque violentiis et injuriis replentes ac corruptentes . Näm et his viis in populorum perniciem iniqui fere omnes politicas suas innovationes inducere omni tempore consueverunt .

XXIII. Sit ergo ad praefata exempla facilis et prompta responsio: et horum statuum aut rerumpublicarum novae institutiones turbulenta fere semper fuerunt et criminosae; utpotè contrà ordinem societatis praeexistentis factae, concedo: et fuerunt legitimae politici regiminis institutiones; ità ut haberi possint tanquam licita et vera pacta civilia ea, quae exinde pseudophilosophi et perduelles colligenda credunt, nego. Mirum autem est, homines sanè eruditos, et adeò methodum et viam certam in veritatis investigatione proclamantes, juris civilis originem à factis incertis, et verosimilius injustis, repetendam putare: quod fere idem est, ac si nos totius proprietatis originem à latrociniis aliquibus publicis deduceremus. Non ità certè se habet methodus nostrae scholae, adeò illis invisae; quae à clarioribus et certioribus ad ea, quae minus clara sunt et certa, procedendum docet.

XXIV. Ut autem nonnihil de utròque facto, seòrsim sumpto, proferamus, Herodotus in primis suspectae fidei scriptor nobis hac in re videtur: non solum quia, juxta criticos, rebus veris fabulas frequenter admiscet; sed quia politicae libertatis adeò fuit nimis amans, ut pro ea patriam suam, Cariam, deserere, et Samum migrare praetulerit. Dato autem, veram

omnino esse nihilominus hanc ejus narrationem, dicimus, apud persas, etiam antequam occiderentur magi qui furtim regnaverant, si res ita verè se habuit, aliquem debuisse fuisse legitimum principem, aut aliquod ibi legitimum politicum regimen extitisse: quum sine eo nulla natio aut populus subsistere possit, et furtum rei furatae verum dominum semper supponat: nullumque adeò inter ipsos primates consultationi fuisse locum; sed regnum ei, cuius fuerat, reddi debuisse. Otēnis verò familia, si ei proprio jure aut libertate inibi subsistere permisum est, veluti natio aut populus independens haberi debet; quin ex hac ejus conditione aut fortuna erui meritò possit, hominem ulla publica libertate naturaliter esse donatum.

XXV. Quod autem ad romanae reipublicae institutionem spectat, hoc est, quod primum exploratum esse deberet, ut ea tanquam legitima haberetur: an, scilicet, fuerit aequum aut iniquum objectum quod primi ejus fundatores, albani, latini, et pastores aut latrones sibi in sua illa colligatione proposuerunt. Et de Romulo quidem ait Eutropius Brev. lib. 1. *Is cum inter pastores latrocinaretur.* Verum non videtur aliis, verbum *latrocinari* praecisè semper in malam partem sumi debere; sed in bonam plerumque potius, prout significat, in armis se

exercere iisque uti contra viarum agrorumque vicinos insidiatores ac grassatores. Hoc sensu Romulum et Remum latrocinatos fuisse, putat Plutarcus. Et Plaut. in Mil. Glor. act. 11, Scen. ult.

*An quia latrocinamini, arbitramini,  
Quidvis licere facere vobis, verbero?*

Et Gracis de Nonio: *Qui apud Regem in latrocinio fuisti.*

XXVI. Quidquid vero sit de hujus aut cuiusvis alterius reipublicae particularis prima institutione, ut plurimum, tanquam criminosae et illegitima habendae sunt omnes: eo quod ex generali hominum repugnantia ad obediendum, et nimis vehementi imperandi cupidine nasci consueverint; quod facilè ac candidè confitebatur, qui ajebat: *Si violandum est jus, regnandi causa violandum est; caeteris in rebus pietatem colas.* Temporis tamè progressu et virtute legum, legitimam auctoritatem, ut in régimine permanerent, adeptae sunt. Atque tantùm abest, ut earum prima compositio, quomodòcumque se habuerit, probet naturalem esse homini statum publicae libertatis, quin potius evincat oppositum. Semper enim et ubicumquè multi homines in historia commemorantur, aut aliquod ejusmodi facinus agressi narrantur, non nisi consociati et sub aliquo capite aut duce

copulati inveniuntur: quae naturae praeclara vox est, apertè docentis, ab ea proficiisci apud ipsos publicae societatis statum. Atque ut ita sentiamus, auctor nobis est ipse Heineccius (*Jur. nat. et gent. lib. II, cap. V, §. XCIII,*). Abramum, Isaaccum et Jacobum, tanquam Principes familiarium segregum, majestatis jura exercuisse, asserens. Hoc est, leges tulisse; supplicia à sontibus sumpsisse; foedera cum aliis pepigisse, bellumque tandem aut pacem fecisse cum hostibus: undè et Nicolaum Damascenum allegat (*Exerpt. Peiresc. pag. 490,*), ajentem, Abramum *regnasse* apud Damascum, et Justin. itèm, (*XXXVI, 2,*) ipsum Abramum et Israel *Reges* appellantem.

XXVII. Objic. 3º Narrat Sextus Empiricus adversus *Mathem.*, lib. 2, eam fuisse apud veteres persas consuetudinem, ut, defuncto rege, per quinque dies sine ullo principe essent, atque in omnimoda et naturali libertate viverent; ex quo sic argumentari licet: publicae societatis status aliquod politicum regimen civilemque ordinem exigit; atqui ejusmodi ordinis existentiam non esse perpetuam et naturalem, sed ab hominum arbitrio et voluntate pendere, praedicta persarum consultissima consuetudo demonstrat, ergo.

XXVIII. Resp. Dist. min. Et praefata

persarum consuetudo publicam libertatem merè permittebat; concedo: eam tanquam naturalem agnoscebat et approbabat; nego. Et quidem consuetudines aut etiā leges quorumcumque populorum ac gentium non sunt nisi rationes vel opinamenta eorum hominum, qui jus habet et debent illa edere, ad bonum publicum promovendum: quae certè eo māgis ad verarum et justarum legum naturam accedunt, quo māgis immediatè et indubie à lege divina naturali, rectae rationis lumine, deducuntur. Quaedam earum sunt merè permissivae alicujus mali, ad majora vitanda; sive ad aliquod indē bonum etiā eruendum: idque ad supremi et sapientissimi Legislatoris, Dei, imitationem, qui nihil mali sineret esse in operibus suis, nisi usque adeò esset omnipotens et bonus, ut bonum faceret etiā de malo. Quod praedicta persarum consuetudo evidentè probat, illud est maximè, homines nimis adeò inordinatè libertatem amare, ut contrà hujusmodi amorem, ipsius libertatis publicae gravissimum malum, ii duxerint permittendum. Eo siquidem id faciebant consilio, ut supremæ potestatis necessitatem plebs experimento cognosceret. Experiebantur enim brevissimo illo anarchiae tempore, homicidiis aliisque criminibus multis societatem turbari et devastari. Et nemo erat, qui in tanta scelerum

confusione, cujuscumque principis aut politici regiminis auctoritatem non cuperet.

XXIX. Objic. 1º contra secundam conclusionis partem. Publicae societatis status non datur sine principibus aut aliquibus politicum in saeculo imperium tenentibus, qui precipue et propriè potentes in terra dicuntur; atqui primus hujusmodi potens fuit Nemrod, juxta illud Gen. 10, v. 8: *Ipse coepit esse potens in terra*, ergo juxta sacram Scripturam status publicae societatis nec est homini naturalis et à Deo institutus, nec eamdem cum hominibus habet antiquitatem. Resp. Dist. min. Fuit Nemrod primus potens aut princeps legitimus et vera auctoritate munitus ad imperandum juxta legis naturalis praescriptum; nego: fuit primus potens aut princeps tirannus, vi et armis alios sacrilegæ sua rationi subjiciens; subdistinguo: fuit primus ejusmodi tirannicum imperium gerens quantum ad aliquid eidem imperio accesorium et accidentale; concedo: fuit primus talis tirannus absolutè; nego. Et quidem Nimrodum principem tirannum fuisse, usurpatumque ac injustum imperium obtinuisse, communis omnium sacrorum interpretum sententia est. Immò idolatriæ ipsum auctorem et parentem Hieronimus, Ciriillus et alii faciunt: eumdem habentes pro Belo, à quo *bel, baal, et baalim* sirorum, phoenicum

et aliarum gentium. Aut igitur injusta et prava est apud omnes homines politica eorum actualis societas, aut ab alio quam ab imperio Nimrodi legitimam dicit originem. Rebellem item hunc fuisse, nomen ejus declarat: quod à radice, *marad*, *rebellavit*, descendit. Rebellionem autem auctoritas aliqua necessario praecedere debet, adversus quam ipsa machinetur et fiat. Unde probabile est, ut dicemus infra, Nimrodum adversus proavum suum Noë rebellionem excitasse: comparataque vi et calliditate copiarum potentia, regnum Babilonis in terra Senaar condidisse.

XXX. Sed et antè ipsum alios etiam similis iniquitatis homines potentes, superbos et aliorum hominum oppressores extitisse, eadem sacra Scriptura testatur, Gen. VI, v. 4, ubi vocat eos gigantes, hoc est, nephilim נְפָلִים à radice, seu verbo *naphal*, quod est cadere, deficere, vel humiliari; eo quod ad eorum conspectum, sive ob corporis vires ac magnitudinem, sive ob animi superbiam ac ferocitatem, alii caderent, deficerent et humiliarentur. At hi non videntur satis numerosum populum subjecisse, ut possent seorsim proprium regnum efformare: quod ille postea consequutus est. Scimus etiam Noënum, Chami posteros, hoc est, filios Chanaan aliis duobus filiis suis Semo

et Japheto subdidisse: quod societatem quidem, et rectoriam sanè eam ac inaequalem, supponit; licet hanc Scriptura expressè non nominet. Cainus quoque in generis humani primordiis civitatem aedificaverat, vocaveratque nomen ejus ex nomine filii sui Henoch. Gen. IV, v. 17. Civitas verò, quantumvis ex rudi materia, et ob ferarum aut hominum metum, ut quidam volunt, fundata, sinè civili et publica societate non subsistit. Quinimmò, quum civitas non sit, ex S. Augustino et communi sententia, nisi hominum coadunatio sub legum vinculo, incredibile omnino est, solam familiam Cain, quae malorum ac rebellium tenet typum, hunc ordinum, à Deo decretum, adinvenisse, non autem filios Seth, qui pro obedientibus, bonis et justis habentur; licet Scripturae littera civitatis aedificationem, quae pro seculari et mundana ibi proculdubio commemoratur, non nisi illis attribuat. Nullo ergo modò potest status publicae societatis à Nimrodo repeti.

XXXI. Objic. 2º Publicae societatis statum, ut naturalem et necessarium, in mundo prioribus temporibus viguisse, nullibi in sacra Scriptura constat. Immò voluntariè illum homines admississe, regemque sibi ad libitum contuisse, non solum in gentibus, verùm etiàm in populo Dei, cuius regimen fuit theocraticum,

patriarchale et amore plenum, satis manifeste apparet. Deuteron. enim cap. XVII, v. 14, ad filios Israel dicit Dominus: *Quum ingressus fueris terram, quam Dominus Deus tuus dabit tibi, et possederis eam, habitaverisque in illa, et dixeris: Constituam super me Regem, sic ut habent omnes per circuitum nationes; eum constituies, quem Dominus Deus tuus eleggerit. Quumque fuerit constitutus.... habebit secum Deuteronomium legis hujus, legetque illud omnibus diebus vitae suae, ut discat timere Dominum Deum suum.... ut longo tempore regnet ipse et filii ejus super Israel.* Ex quibus verbis eruitur, disperso per omnem terram genere humano post diluvium, morem generali apud gentes fuisse, in societatem publicam voluntariè coalescere, regemque sibi, prout libuit, constituere: eundemque morem ac facultatem populo etiam Israel, licet regimine speciali aut theocratico per duces aut judices eo usque gubernato, à Deo ipso tandem fuisse concessam. Quum enim à Samuele Regem posteà flagitasent, indicatumque ac praedictum eis foisset jus Regis quem postulabant, omnia sua addicimandi, eosdemque ipsos in servitutem redigendi; illum tamè ab eo, quasi in poenam sua defectionis, obtinuerunt. Sic ergo exinde argumentari licet. Ille status non est naturalis nec

à Deo institutus , quem homines tūm ethnici tūm fideles , voluntariè semper assumpserunt , imperium etiām tirannicum sibi eligentes ; atqui talis est status societatis publicae seu politicus , ergo .

XXXII. Resp. dist. maj. Status quem homines tūm ethnici tūm fideles voluntariè semper assumpserunt , imperium tirannicum sibi eligentes , non est naturalis nec à Deo institutus , quantum ad genericam ejus rationem , quae sufficit ad libertatem tollendam , publicumque apud ipsos ordinem statuendum ; nego : non est naturalis nec à Deo institutus quantum ad ejus formam particularem individuamque institutionem , quam vitiis homines ferè semper corrumpere consueverunt ; concedo . Et ecce in societatum particularium institutione , si ut et in aliis rebus multis , opus Dei , totius bonitatis et rectitudinis fons indeficiens , et opus hominis , defectuum et corruptionis foecundissima causa : ut tot absurdissimorum errorum socialium , qui hodiè in Europa vigent et dominantur , ac miseriae et aerumnarum , quibus ejus populi propterea premuntur , radicem in ipsius Dei ac sapientissimae ejusdem circè homines ordinationis ignorationem refundere debeamus . Ipsi gloria in saecula . Amen . Vult ergo Deus , ut homines in societate vivant ; idque ut exequantur , non tantum lege

sua naturali omnibus illis praecepit, sed et mutuis eorumdem indigentiis ac utilitatum incitamentis ad eam amplexandam sapientissimo consilio veluti coegit: quemadmodum et in ipsorum multiplicationis exercitio seu generatione voluptatem praecepto copulare providit. Ad hujus societatis conservationem et ordinem dominium imperantium in subditos adeò est, et fuit semper necessarium, ut etiàm in statu innocentiae extisset: juxta D. Thomam, 1<sup>a</sup> part., quaest. 96, art. 4, à Dei propterea voluntate immediatè statutum: sicùt et divisio totius societatis humanae in varias societates particulares, quas status, respublicas aut regna vocamus. Quum enim unus esset populus in terra Senaar post diluvium, vellentque superbi illi homines turrim aedicare, dixit Dominus, Gen. cap. XI, v. 7: *Venite igitur descendamus, et confundamus ibi linguam eorum, ut non audiat unusquisque vocem proximi sui.* Atque ità divisit eos Dominus ex illo loco in universas terras.... et inde dispersit eos Dominus super faciem cunctarum regionum.

XXXIII. Quinam verò sint in particulari summi imperantes, qui praeesse iis statibus aut regnis debeant, ad legum humanarum positivarum eorumdem statuum spectat designationem; quarum observantiam divina naturalis necessario

praescribit. Accidere quidem alicubi aut aliquando potest , ut nullae sint ejusmodi leges, quae imperii successionem decernant ; at in eo casu, qui tamen infrecuens ac perrarus est , aut ipse populus cum suis primatibus decerneret, non jure quidem proprio ac permanentè sibi inherente , sed quia Dei providentia , ipso facto , eum tunc ab omni politica subjectione liberum relinquere voluisse , aut tribunalia , ab iisdem legibus stabilita , de ea re judicarent : sicut et de aliis rebus à legibus praetermissis judicant ; ita tamen ut nullum proprium jus ad hujusmodi electionem faciendam in populo recognoscant ; nisi ei fuerit à sublimiori potestate concessum. Atque hanc quidem facultatem populo Israel fuisse à Deo concessam , in praefato Deuteronomii loco appareat : ubi nibileminùs communiorem imperii successionem per viam generationis , in lege naturali fundatam , Deus ipse veluti confirmat per illa verba , quibus conditiones indulgentiae finit : *Ut longo tempore regnet ipse , et filii ejus super Israel.*

XXXIV. Sive ergo consideretur suprema civilis potestas ut officinm et onus , sive ut jus et summa societatis praerogativa , à priori possessore in posterūm , legum humanarum rectaeque rationis sententia ac judicio , transmitti debet : sicut et jus aut proprietas aliarum rerum

transfertur; quamquam multò quidem divinior illa sit: utpotè quae non suprà res, sed suprà personarum ac integrarum etiàm gentium actiones, veluti publicum magisterium, versatur. Primus hujus potestatis possessor, primusque etiàm harum legum auctor, rectaeque item rationis minister et organum fuit Adam. Et si quidem tamen omnes imperantes, ejus successores, quam horum subditi legis naturalis rectaeque rationis documenta perfectè servassent, nec forma primitivi imperii, quae purè monarchica fuit, unquam in mundo immutata fuisse, nec tiranides extitissent, nec rebelliones, nec clades aliaeque calamitates, quae exinde proveniunt; sed pax foelicitasque perpetua totum occupasset orbem. Similis tunc fuisse humana societas ei, quam docet D. Thomas, extitram fuisse, si naturam hominis originale peccatum non depravasset: in qua et Principes, non nisi commune bonum prae oculis habentes et officio consulendi, imperassent, et subditi ejus aequo ac libenti animo in omnibus paruissent. *Hoc enim*, ut ex S. Augustino angelicus Doctor addit, *naturalis ordo praescribit: ita Deus hominem condidit.*

XXXV. At quum hominum hodierna societas, ignorantiae et malitiae tenebris involuta, ab hac perfectione toto coelo distet; quodnam huic generali malo provisum est à Deo generale

remedium? — Istud et utique indubium ac praesentaneum. Imperantibus, auctoritate sua abuentibus nec custodientibus leges justitiae, supplicium Deus ipse sibi imponendum reservat, dicens: Sap. VI. *Audite ergo Reges et intelligite; quoniam judicium durissimum iis, qui praesunt, fiet: exiguo enim conceditur misericordia; potentes autem potentè tormenta patientur.* Non enim subtrahet personam eujusquam Deus, nec verebitur magnitudinem eujusquam; quoniam pusillum et magnum ipse fecit, et aequaliter cura est illi de omnibus; fortioribus autem fortior instat crutatio. Subditis autem suam conditionem obediendi legesque societatis servandi, non adimplentibus, poenam Principibus infligendam committit, ajens: Ap. Rom. XIII. *Omnis anima potestatibus sublimioribus subdita sit; non est enim potestas nisi à Deo; quae autem sunt à Deo ordinatae sunt. Itaque qui resistit potestati, Dei ordinationi resistit. Qui autem resistunt, ipsi sibi damnationem adquirunt. Non enim sine causa (Princeps) gladium portat. Dei enim minister est: vindicta in iram ei, qui malum agit.*

XXXVI. Quod si quis dicat de potestatibus legitimis loqui hic Apostolum, et non nisi veras, hoc est, justas ferentibus leges, respondendum ei erit, verum id esse quantum ad primum

caput : videlicet , intelligenda esse Apostoli verba  
de potestatibus legitimis dumtaxat : quarum ab  
illegitimis non est admodum difficilis aut obscu-  
ra discretio ; omnino verò falsum quantum ad  
secundum , quod ad leges spectat. Näm si pe-  
nès populum esset de legibus judicium ferre,  
ipse tantum populus foret demum unicus legislator ; nec ulla legitimi imperii forma esset nisi  
democratica : cui opposita est prorsus tota haec  
nostra sententia , sacrae Scripturae et rectae  
rationi evidentè innixa. Possunt utique impe-  
rautes , ut homines , leges injustas aliquando fer-  
re ; possunt legem status fundamentalem , seu,  
ut vocant , *Constitutionem* , ordinationibus editis  
pro arbitrio et , si placet , sine causa infringere ; at gladiis , quo omnia haec et alia qua-  
cumque in societatem delicta punienda forent ,  
non nisi in manibus eorumdem principum Deus  
posuit : ut , quae ordine sapientissimo ipse cons-  
tituit , ordinata subsistant ; neque omnium in  
omnes homines horrificum potius ac perpetuum  
bellum inducatur. Hujus rei confirmationem ex  
ipso praemicato in objectione Samuelis loco  
desumere possumus. Quum enim ab eo peti-  
issent regem maiores natu Israel , ut eos ab hoc  
postulationis proposito averteret , praedixit eis ,  
ex mandato Domini , jus regis , qui regnaturus  
erat super eos. Neque ad illud solum istud jus

extendit, ut denuntiaret, aliquantulum individuali eorum libertati regem detracturum, aut alicui politicae institutioni modum impositurum; sed talè potius fuisse futurum: *Hoc erit jus Regis* (dixit), *qui imperaturus est vobis: filios vestros tollet, et ponet in curribus suis.... filias quoque vestras faciet sibi unguentarias et focarias et panificas. Agros quoque vestros et vineas et oliveta optima tollet, et dabit servis suis. Greges quoque vestros addecimabit; vosque eritis ei servi* (1. Reg. cap. VII, v. 11).

XXXVII. Quid verò? Vocabini verè à Deo potuit jus, quod injustum semper fuisse et prorsùs tirannicum? Et ità sanè. Non quidem ex parte Regis, qui non nisi injustè atque tirannice tam gravi injuria subditos suos affecisset; sed ex parte eorumdem subditorum: qui, tametsi adeò soeva dominatione oppressi, nullum tamen jus expeditum habuissent, neque habent unquam, legitimo suo imperanti resistendi: *Qui enim potestati resistit, Dei ordinationi resistit.* Ut inde etiàm constet, quantum malignitatis includat illa sententia, qua quidam hodierni politicae scientiae scriptores populis jus concedunt, et quidem exigibile, ut illi vocant, ad hoc ut justae sint leges, quibus à suis principibus gubernentur. Quum enim ipsi populi hujus justitiae

fiant judices, et non alia eisdem adsit publica vis aut via, qua praedictum jus tueantur, quam tumultuosa resistantia et rebellio, absolvuntur à crimine illa doctrina quorumcumque statuum commotionum auctores ac perturbatores. Radix ergo omnium hujusmodi errorum est falsa, aut saltēm ambigua, quae nimis communiter efformatur à multis, societatis idea, eam cum Jacquierio, quem illustrare aut emendare hac in re suscepimus, definientes: *Hominum coetus ad promovendum bonum commune.* Quasi homines, disjuncti prius ac segregati, ob quaedam mala vitanda et opposita assequenda bona, conjungi et in societatem coalescere ipsi decreverint. Nām juxta sistema politicum, hac conclusione comprehensum, quod praferendum putamus, definiri potius debet humana societas: *Hominum coetus, à Deo institutus, ad ipsorum hominum foelicitatem suique nominis gloriam promovendam.*

## SECUNDA CONCLUSIO.

*Jus politicum quantum ad publicae auctoritatis existentiam et ordinem societatis eamdem cum hominibus habet antiquitatem, estque à Deo immediate institutum; licet quantum ad leges positivas et particulares, ex quibus coalescit, ex summorum imperantium ratione et arbitrio pendeat.*

XXXVIII. Prob. prima pars. 1º Status publicae societatis est homini naturalis, in eo que fuerunt jàm à Deo primi homines constituti; atqui ad hujus status conservationem et perfectionem necessarium est jus politicum quantum ad publicae auctoritatis existentiam et ordinem societatis, ergo. Major constat ex conclusione anteriori. Minor autem probatur. Societatis publicae status subsistere nequit sine proprio ac essentiali vinculo ac nexu; atqui proprium ac essentiale vinculum societatis publicae est jus politicum quantum ad publicae auctoritatis existentiam et ordinem societatis, ergo. Si major negetur, probari potest hoc modo: nulla res subsistere potest in mundo nec politico nec morali, nisi sit una, juxta illud

scholasticorum vulgatum axioma , et metaphisi-  
cè quidem demonstrabile , quod ait : *Omne ens  
itù est unum , verum , et bonum , ut mutuo  
haec convertantur* : non ergo dari potest socie-  
tas publica , nisi illi multi , ex quibus coalescit ,  
et phisicè non sunt nisi multi , aliquo morali  
vinculo conjungantur et fiant unum . Quod autem  
proprium ac essentiale vinculum publicae socie-  
tatis , sit jus politicum , non minùs evidens est .  
Nisi enim adsit in summo imperante auctoritas  
dirigendi societatem eique leges ferendi , et in  
subditis obligatio eisdem legibus se subjiciendi ,  
non potest ordinata illa subsistere neque con-  
servari . Plurima enim sunt crimina , quæ ad  
eius dissolutionem inducunt : eaque leges pos-  
itivæ , aut publica ejusdem , cuius hoc est prae-  
cipuum munus , tutelaris potestas cohibere  
debent .

XXXIX. 2º Genus humanum à sui exor-  
dio rationem immediatè à Deo accepit : nec  
enim ea esse potest inventum humanum ; atqui  
ubi est ratio in hominibus , est etiàm jus poli-  
ticum quantum ad publicae auctoritatis existen-  
tiā et ordinem societatis , ergo . Major est  
omnino certa ex generali omnium sententia ;  
quamquàm à quibusdam pseudophilosophis , qui  
hipotheses arbitrarias et nullo fundamento in-  
nixas sibi efflaguant , in dubium fortè vocabitur .

Ratio enim non solvitur nisi sermonis aut eloquii ministerio: quod à primo homine usque ad nos adeò necessaria successione transmittitur, ut, si-  
ve in parvulis, sive in adultis non nisi per istud tantum illa expedita reddatur. Laudandus sanè ea de re Vice-Comes de Bonald, qui, il-  
lorum rejectis cavillationibus, rem hanc quasi  
ad demonstrationem perduxit (Vid. cap. 11,  
tom. 1º sui operis, cui titulus: *Recherches  
philosophiques sur les premiers objects des con-  
naissances morales.*) Minor probatur. Ubi est ra-  
tio, est recta ratio: ipsa enim ratio viam  
designat et lumen praebet, quo aequum ab ini-  
quo, rectum à pravo, discernatur; atqui quod  
primum recta ratio patefacit, est jus politicum,  
sine quo nullus apud homines ordo invenitur,  
ergo ubi est ratio in hominibus est etiàm jus  
politicum quantum ad publicae auctoritatis exis-  
tentiam et ordinem societatis. Prob. min. Quod  
primum recta ratio patefacit, sunt legis natura-  
lis primaria principia: ut, quod tibi fieri non  
vis, alteri ne feceris; bonum faciendum; veri-  
tatem amandam; Deum colendum; parentes  
honorandos, et alia similia; atqui haec officia,  
in praxi et ut oportet, impleri non possunt si-  
ne politico jure; quae enim alii aliis officia ho-  
mines praestant, et jure ab invicem exigere  
possunt, ità justitiae naturalis regulis subjiciuntur,

ut eorum causae non nisi tertio judice plerumquè finiri valeant, ergo. Adeò autem necessario consequitur publicam societatem jus politicum quantum ad supremæ auctoritatis existentiam et ejusdem societatis ordinem, ut non sit cùr amplius in hujus rei confirmatione immoreatur.

XL. Prob. ergo 2<sup>a</sup> pars. Videlicèt, quod jus politicum quantum ad leges positivas et particulares ex quibus coalescit ex summorum imperantium ratione et arbitrio pendet. Potestas legislativa est praecipua facultas aut munus summorum imperantium, ergo. Prob. ant. Societati imperare nihil est aliud, nisi ordinare eos, quibus imperatur, ad bonum commune, intimando illis ea quae ad hunc finem opportet eos facere vel omittere; atqui facultas has ordinationes faciendi est ipsa potestas legislativa, ergo. Major est explicatio imperii supremi sive independentis. Minor definitio potestatis legislativæ, qua hujusmodi imperium pollet.

XLI. Quoniam verò non de imperantium aut supremi imperii sive majestatis juribus hodiè ubiquè agitatur quaestio, sed de personis ad quas hujusmodi spectant jura: hoc est, an soli principes juxta legis naturalis præscriptum jus habeant in suis statibus leges condendi, an etiàm populi in hujusmodi facultatis partes

vocandi sint, prius illud, quod nobis rationabile omnino videtur, hoc modo probatur. Leges condere, nihil aliud est, quam eos, qui legibus subjiciuntur, ad bonum ipsorum et commune dirigere, seu bonum societatis commune curare. Unitas autem adeo ad rationem bonitatis pertinet, ut id ad quod intentio multitudinem gubernantis tendit, et tendere debet, sit unitas, concordia et pax; quae nata aliunde sunt ab uno melius quam à multis produci. Sicut enim calor ab igne, et frigiditas à frigore, sic unitas causatur ab uno; unde multi multa unire et concordare non possunt, nisi aliquo modo inter se uniantur et fiant unum, actionem temperando passioni, aut aliquo alio modo. Illud quoque, quod est per se unum, potest esse causa unitatis convenientius quam multi uniti: qui non sunt unum nisi per accidens; unde multitudo melius gubernatur per unum quam per multos. Relinquitur ergo, quod jus politicum, quantum ad leges positivas et particulares ex quibus coalescit, ex uniuscujusque principis ratione et arbitrio pendeat. *Et hoc est*, concludit D. Thoinas, 1<sup>a</sup> part., quaest. 103, art. 3, *quod philosophus dicit: XII Metaph.: Entia nollunt disponi male, nec bonum pluralitas principatum: unus ergo princeps.*

**XLII.** At exurgit hic alia quaestio, nūm

inter has leges, quas positivas et particulares vocamus, et ex solius principis ratione et arbitrio pendere voluntus, comprehendendi etiam debet lex status fundamentalis, quae ejusdem regiminis formam designat, et *Constitutio* seu politicum uniuscujusque reipublicae sistema appellatur. Et utique hanc etiam legem fundamentalem seu *Constitutionem* inter positivas et particulares praefatas comprehendendam censemus; quamquam majorem de hac re haec nostra sententia explicationem requirat. Illudque in primis ad eam expediendam statuendum est, leges humanas, quantuincunque primariae illae ac fundamentales sint, vere et propriè leges non esse, nisi legi naturali ac rectae rationi convenientia. Atque ab hac convenientia et consensione suam desunt vim; si tamen practerea à legitima potestate proveniant, sive monarchica ea sit, sive aristocratica, sive democratica. Possunt enim et hae etiam regiminis politici formae esse legitimae, legitimaque propterea in iis suprema civilis potestas existere, dummodò juxta legis naturalis rectaeque rationis praescriptum sint institutae. Hoc est, si à potestatis monarchicæ anterioris ratione, quae legis humanae, jam tunc vigentis, qualitate gaudebat, sunpsit exordium. Nam quum nihil aliud sit lex civilis, quam recta ratio publicae societatis, haecque

eamdem cum hominibus habere debuerit antiquitatem, nulla politica potestas aut institutio potuit esse unquam legitima, nisi anteriori potestati aut regimini, quod non potuit non esse monarchicum, fuerit consentanea.

XLIII. Hac ratione reipublicae romanae legitimitatem non tam à senatusconsulto desumendam putamus, quam à Servii Tullii auctoritate, qui ejus formam ante mortem descriptam reliquit (Vid. Dionis. Halic. lib. 4, et Liv. lib. 19, cap. 46 et 48). Ita ut non principes, qui per Deum imperant, à populis quibus imperant, suam unquam auctoritatem accipient; sed è converso, populi, si quam potestatem alicubi et sub aliqua regiminis forma quandque habuerunt, eam non nisi ab anterioribus suis principibus accepisse, sint credendi. Ut enim ordo in societate consistat, hanc generalem ejus legem ponere oportet (ut ponit optimè P. Ventura in suis Comment. cap. X, §. XLIX, pag. 336), *nullibi subjectum sibimetipsi constituere potestatem aut sibimetipsi imperare*; sed distinctas personas haec duo, in statu naturae lapsae inter se pugnantia, necessario exigere. Atque, hac doctrina praedicto actuali statui accommodata, salva semper manet ratio poenae in subjectione hominis alteri homini, quam Deus toti generi humano propter primum

peccatum injunxit, dūm ei, in persona Evaē, communis omnium matris, indixit: *Sub viri potestate eris, et ipse dominabitur tui.*

**XLIV.** Prae oculis est etiām habendum, leges omnes humanas esse mutabiles: ut quae sub quibusdam circstantiis temporum aut personarum utiles et bono communi salutares fuerunt, sub aliis circstantiis evadant fortè exitiales et noxiae. Potuit abs dubio quondam, et in aliqua gente, esse utile paci et bono ipsius, principes ei nonnullam partem concessisse in legum editione: quod nostris temporibus per institutionem senatum ac comitiorum, quae *camaras, cortes, dietas* aut *parlamentos* vocari solent, fieri consuevit. Enim verò si exinde populi existiment, aliquam supremæ potestatis radicem aut partem jure ad ipsos pertinere, dissolvendas has omnes institutiones putarem. Non modò quia, in hoc sensu acceptae, eorumdem summorum imperantium publicam actionem remorantur saepèque impediunt; sed quia in discordiae etiām discrimen rempublicam plerumquè ducunt, et in eo saltem errore retinent, quo l multi existiment, populare sive multorum regimen sibi utilius esse; quuin, utpotè meiè humanum, et à Dei, quod in universum mundum exercet, regimine alienum, non possit non esse imperfectum, et communī societatis bono aerumnonsum.

XLV. At dicet fortasse aliquis: emendentur benè quidem reipublicae *Constitutiones*; sed fiat earum emendatio aut correctio per eos qui eas formaverunt, aut quibus potestas legislativa specialiter est commissa. Sunt enim praedictae constitutiones veluti pacta publica inter nationes et principes inita; nec iis nisi sub conditionibus, in illis contentis, traditum est imperium. Respondetur autem hanc objectionem in eamdem quam impugnamus, à pactis dessumptam, societatis originem iterum incidere; nec quidquam unquam nostris conatibus efficiemus, nisi verae ac salutaris doctrinae studio, per eos ad quos spectat promoto, praedicta perturbatrix opinio aut error ab hominum mentibus evellatur. Pacta civilia, quae in rerum publicarum *Constitutionibus* apponuntur, verè et propriè talia esse non possunt, quod principes semper obstringant. Supremi namque ac independentis imperii, sive, ut vocat Apostolus, sublimioris potestatis jus summum non esset, si aliud jus humanum, à quo dependeret, in eadem societate existeret. Sed neque ab omnibus renipublicam constituentibus, quorum ratio et voluntas per alios repraesentari nequit, effecta sunt; sed à quibusdam plerumque potentioribus, qui, licet populi partes agere videantur, sua tamen magis quam ejusdem populi negotia curant:

cujus barbariem extremamque perniciem, per ignorantiam morumque corruptionem invectam, consentiant. Non constant insuper saepè illa pacta de rebus, de quibus cum populis pacisci principes possunt: qui quod iis melius convenire judicant, praecipere semper aut prohibere tenentur. Non enim est lex, quod ipsi ad libitum et sine causa volunt; sed quod cum ratione, legi Dei naturali consentanea, in ordine ad commune bonum volunt et jubent. Atque ut id praestent, ponit D. Thomas in principibus prudentiam regnativam, eamque denominari ait (2.<sup>a</sup> 2.<sup>ae</sup>, quaest. 50, art. 1<sup>o</sup>), *à principali actu regis, qui est leges ponere: quod etsi conveniat aliis, non convenit eis, nisi secundum quod participant aliquid de regimine regis.* Huic ergo prudentiae relinquendam putamus, si quam politicae alicujus *Constitutionis* emendationem recta ratio et ejusdem status bonum publicum aliquando exigat: qua et pax, quod praecipuum est reipublicae bonum, conservabitur, et omnes, aut fere omnes, praedictam emendationis necessitatem fortasse cognoscent, eamque propterea amabunt.

XLVI. Aut igitur pacta seu conditiones, quarum observantiam in sui imperii assumptione nonnulli principes cum juraemento promittunt, ad Dei cultum, pacis publicaeque justitiae

bonum spectant, sine quibus vera societatis foelicitas non consistit, aut ad media sive ordinationes politicas particulares, quibus praefata communia bona comparantur. Illa et populis et ipsis etiām principibus sunt utilia, et adimplenda; quamquām populi nec de iis ullum in suos principes ferre unquām judicium possint. Ista non modo sunt inutilia et infructuosa, sed noxia ut plurimum rectaeque ac facili regiminis administrationi contraria. Universa, quae latè patet, statuum aut regnorum Europae hodierna perturbatio hujus rei perspicua probatio est. Ab eorum enim *Constitutionibus*, in quibus pseudopolitici ex divina monarchica cum populari humana regiminis forma monstrosam commixtionem sibi effinxerunt, nata est. Et quenam, quaeso, horum omnium errorum et malorum prima scaturigo et radix? — Dei, ut dixi, ignoratio, ejusque circā societatem humanam ordinationis. Nascuntur haec mala ex prava doctrina: ex rebellione rationis privatae et particularis, quae subjecta esse debet, in publicam seu societatis, ob cuius conservationem et ordinem est haec à Deo instituta et provissa. Nascuntur haec mala ex philosophiae ac sapientiae penuria, in tanta, quanta proclamat, litterarum luce. Aliam et altiorem adhuc hujus ejusdem mali radicem indicarem, si eos, quibus has inopes

elucubraciones submitto, ad meam omnem doctrinam amplexandam sufficienter dispositos existimarem.

XLVII. Objic. 1º Aristoteles, philosophorum facile princeps, distinctionem civilemque ordinem inventum aegyptiorum fuisse, affirmat. Haec sunt verba, quum de aegyptiis antiquissimis sermone in instituit (*Polit. VII, 10*, apud Perizonium, *Orig. Egypt. tom. I, cap. I, pag. 4*, ed. Traject. ad Rhen. an. 1736,): ἐντοι γαρ αρχαιοτάτοι μὲν δοκοῦσιν εἶναι, γομον δὲ τετυχησσι καὶ ταξεως πολιτικῆς. Διό δει τοῖς μὲν εὐρημένοις ἵναντες χρησθαι, τα δε παραλειμμένα πειρασθαι ζητειν: Hoc est, juxta Joach. Perionii et Lambini lectiones: *Aegyptii enim antiquissimi omnium fuisse videntur, legesque civilemque ordinem instituisse. Unde oportet, jām inventis libere et multum uti; praetermissa verò tentare quaerere.* Non ergo eamdem cum hominibus habet antiquitatem, neque à Deo est immediatè institutum jus politicum quantum ad publicae auctoritatis existentiam et ordinem societatis. Resp. distingo ant. *Aegyptii leges civilemque ordinem instituerunt determinatè seu in particulari, in iis, videlicet, quae ordini societatis sunt adventitia, neque ad ejusdem existentiam omnino necessaria;* concedo: *civilem societatis*

communem ordinem instituerunt absolutè, ità ut ante ipsos, aut nulla usquām publica humana societas, aut omnino inordinata ipsa ab exordio extiterit; nego. Aliquis quidem ordo civili societati est necessarius, ex auctoritate leges ferendi in summis imperantibus, et obligatione subditorum iisdem legibus se subjiciendi, procedens. At hic ordo, generatim sumptus, et naturae humanae societatis prorsus essentialis, variis ordinibus seu politicis institutis potest in particulari servari: quae pro varietate temporum, locorum aut personarum, ad humanam quidem spectant adinventionem. Atque hujus quideam generis quemdam specialem civilem ordinem aegyptios primos omnium instituisse, non inficiamur; non verò communem illum, quem humanae societati necessario coevum fuisse, ipsa recta ratio perspicue demonstrat. Quod si quis et de hoc etiam ordine, generatim sumpto, Aristotelem loquutum fuisse contendat, ab hujus sententia discedere non gravamur: qui eam sive ab Herodoto, sive ab aliquo alio sublestae fidei historiographo accipere potuit: tunc vel maximè, quando, quum divinitatem hominibus tribuere eorumdem hominum insaniam non verebatur, mihi non erat, quod divinae Providentiae dispositiones circà eorumdem publicas societates iisdem etiam adjudicarent.

XLVIII. De harum societatum , rerum publicarum , statuum , nationum aut regnum origine , sicuti et de aliis primordialibus rebus multis duplicitè loqui possumus : videlicèt , aut prout ea in sacris litteris quodam modo continetur , aut prout ex historia prophana et naturali ratione deduci potest . Utraque hac via operae praetium est , eam hic breviter investigare . Et quantum quidem ad id quod de civilium statuum origine et distinctione sacrae litterae nobis indicant , palam est , Deo ipso immediatè per mirabile confusionis linguarum signum , paulò post diluvium patratum , et in novem prioribus versibus seu articulis Capitis undecimi libri Genesios contentum , tribuendam esse . Ad cujus rei clariorem intelligentiam , notandum in primis est ac praesupponendum , ea quae Capite decimo refert Moises de dispersione generationum trium filiorum Noë , quoniam de his immediate ante mentionem fecerat , per prolepsim sive anticipationem ab ipso narrari , et praedicto confusionis linguarum Capitis sequentis signo posteriora esse . Non enim videtur verè dici potuisse , *fuisse terram labii unius ac sermonum eorumdem* , quemadmodum in Capite undecimo legitur , postquam divissae fuerant gentes , *unusquisque secundum linguam suam in nationibus suis* , ut Capite decimo et anteriori praemittitur . 2º Pro

certo etiā statuendum videtur unam eamdemque fuisse terrae divisionem, quae capite X, v. 25, commemoratur, ubi de Phalego dicitur, quod *in diebus ejus divisa sit terra*, ac dispersionem Noachidarum de campo Senaar in varios terrae tractus, de qua v. 9, capitibus sequentis legitur: *Et indē dispersit eos Dominus super faciem cunctarum regionum.* Praeterquam quod enim nullam veri speciem praefert, illos homines, postquam dispersi jām fuerant, iterū et in eundem locum se collegisse, nihil de hisce rebus scire possumus nisi ex sacra Scriptura; quae tamen nullum exhibet vel minimum vestigium istius duplicitis secessionis. Sed cum priori Capite tantum exponatur, in quas gentes et terras Noachidae secundum suas familias et linguas fuerint separati, posteriori ipsa occasio, causa et historia ejusdem secessionis traditur.

XLIX. 3º Quumque causa tantum proxima confessionis linguarum, et subsecutae indē dispersionis, ibi exponatur: superba, scilicet, aedificatio civitatis et turris à filiis Adam suscepta, non autem animus, propositum aut consilium, quo isti primi humani generis propagatores tantum opus fuerint agressi, et hoc etiā ex ipso sacrae Scripturae contextu deducere possumus. Dixerat enim Dominus Noë et filiis ejus: *Crescite, et multiplicamini, et*

*ingredimini super terram , et implete eam*  
 (cap. IX , v. 7 ,): ad quod praedicta dispersio  
 erat necessaria; prouinque est credere , Noa-  
 chum ipsum eam illis ex Dei voluntate sua  
 auctoritate denuntiasse: non tam quia Josephus  
 id disserte affirmat , I , 5 , et S. Philastrius  
**Brixensis** Episcopus adeo id confidenter tradi-  
 dit , ut in haereticorum ordinem retulerit eos,  
 qui contrà sentiunt , sic scribens : *Sunt quidam*  
*haeretici , qui de divisione orbis terrae et par-*  
*titione habitationis recte non sentiunt , dispu-*  
*tantes , quod graeci coeperint , aut aegyptii ,*  
*aut persae describere orbem terrae universum;*  
*non Beatus Noë suis filiis tribus post diluvium*  
*diviserit , dederit ac definierit et partierit*  
*ordine....* (Est absque ulla nota in *Bibliotheca*  
*Patrum* , ed. *Lugdun.* , an. 1677 , tom. V ,  
 pag. 717) quam quia ex natura rei et perpe-  
 tua Dei consuetudine id quasi necessario sequi-  
 tur. Illi verò quum , et solitudinem horrerent,  
 et societatem primigeniam , in qua nati fuerant,  
 nimis amarent , nec Deo , nec Noacho , principi  
 et voluntatis divinae apud ipsos procūldubio  
 interpreti , auscultaverunt ; sed rebelli potius  
 contrà Noachum Nimrodo , cuius nomen non  
 aliud significat quam : *rebellemus , rebellemus;*  
 atque ita penè omnes , licet non omnes pari ani-  
 mo rebellandi , civitatem excitarunt et turrim:

quo et diutius manerent conjuncti , et dispersio-  
neum , quam metuebant , ad longius saltem tem-  
pus procrastinarent . Unde verba illa , quibus in  
praefatam aedificationem consenserunt , dicentes :  
*Venite faciamus nobis civitatem et turrim....*  
*antequam dividamur in universas terras , pro-*  
eo accipienda sunt , ac si dixissent : *potius quam*  
*dividamur* ; quemadmodum et textus hebraicus  
expressè habet , פֶּן נִפְרֹא עַל פְּנֵי כָּל חָוּץ : ne  
*fortè dividamur in universas terras* . Si enim  
dispergi illi ac separari decrevissent , nec aedi-  
ficassent probabilitè civitatem , in qua non cre-  
debant habitatores , nec oportunum Deus duxisset  
labii confusionem in eos immittere , ut eosdem ,  
quasi volentes aut nolentes , ad praefatam dis-  
persione adigeret .

L. 4? Neque consideranda est haec disper-  
sio quasi societatis primitivae ac praeexistentis ,  
cui Deus benedixerat , dissolutio aut eversio ;  
sed divisio tantum atque partitio unius illius in  
multas et varias , ad generis humani multipli-  
cationem sapientissimo consilio à Deo provisa ;  
ita ut unaquaeque earum primigeniae illius , à  
qua descenderaat , naturam et ordinem perpetuo  
et integrè apud se retineret : sub proprio , scili-  
cèt , duce aliquo aut praeside constituta , cui  
caeteri obedire deberent . Idecò diversitatem  
linguarum non in individuos Deus induxit , sed

in familias et cognationes , in quibus semper caput aliquod aut pater gubernator adest : *Unusquisque secundum linguam suam et familias suas in nationibus suis.... in cognitionibus, et linguis et generationibus, terrisque et gentibus suis.... secundum cognitiones et regiones in gentibus suis.* 5º Sub hac igitur forma , et expositiva Noachi dispositione , primitivis illis rebus publicis aut politicis societatibus distinctis ac stabilitis , non alia data est eis lex , ad sui conservationem et bonum publicum promovendum , quam naturalis : à Deo primi hominis menti impressa , et per eloquii facultatem eidem ab ipso etiā Deo supernaturaliter concessam , ad omnes posteros deinceps communicanda . Quumque hujus legis notissimum sit documentum , non patrem à filiis , sed filios potius à patre gubernari oportere , eique debere obedire et subjici , consequens est , post statuum aut societatum divisionem filios aut nepotes Noachi earum principes fuisse constitutos : *unusquisque secundum linguam suam et familias suas , in nationibus suis;* quemadmodum et ante praedictam divisionem totius humani generis societati praepositus , princeps et rector extiterat ipse Noachus : cui Nimrodus nonnisi per rebellionem in terra Senaar successit . A Deo ergo ipso repetenda est civiliū societatum origo , et sub forma quidem

monarchica: quum popularis aut democratica nullum in sacris litteris fundamentum habeat.

LI. Utrum autem haec familiarum dispersio, atque ad cō civilium statuum distinctio, ad Phalegi natales sit referenda, aut ad ultimos ipsius dies, nihil ad nos, qui illius tantum auctorem inquirimus, et Deum ipsum fuisse probavimus; non homines, quasi isti fuerint, qui, ut quidam ajunt, propriam suam naturam status politici adinventione perfecerint. Probabilior nobis prior illa pars videretur, nisi Sap. cap. X, v. 5, scriptum esset: *Haec (Sapientia) et in consensu nequitiae, quum se nationes contulissent, scivit justum, et conservavit sine querela Deo &c.* Abrahamum proculdubio designans, Nimrodi rebellionem ad ultima Phalegi tempora rejiciendo. Quamquam hic nequitiae consensus, et ante Abrahamum collatus ibidem innuitur, et de consensu in idolatriam, quae rebellioni successit, potest etiam congruentē accipi.

LII. Disquiramus modo, nūm, ratione naturali humanaque historia spectata, ejusdem politici status origo sit etiam divina adserenda. Licet enim fateantur omnes, domesticam societatem sive familiam à Deo esse institutam, et homini naturalem, id tamen plerique de societate publica seu civili constantē negant, ajentes:

homines ex statu primitivo aequalitatis et libertatis ad statum civilem, quem *adventitium* propterea vocant, ingenio proprio, et inita inter se conventione processisse. Verum hic conventionalis processus vel ex eo solum fictitius apparet, quod nullum, neque in naturali ratione neque in antiqua historia, fundamentum habeat. Sive enim mente percurratur tempus, quod *obscurum* ab eruditis vocatur, et cujus notitia ex aliquibus traditionibus, sola, eaque lubrica fallacique, hominum memoria subnixis, desumitur; sive quod *fabulosum* ab eisdem dicitur, eo quod à cantilenis, quibus praecipua heroum suorum aut totius etiā gentis facinora celebra- bant antiquissimi populi, initium duxit: ut inde originem dēin inter graecos traxerit, non vera et certa historia, sed illa quae poeticis est involuta fabellis, quales fuerunt, teste Josepho, lib. 1<sup>o</sup> contra Apion., ipsa *Homeri carmina non litteris olim, sed memoriae cantorum mandata*; sive quod propriè *historicum* communitè appellatur, et initium ducit in Oriente à Ninives destructione; in Graecia ab Olimpiadibus constitutis, et ad usum chronologicum accommodatis; in Italia verò ab urbe Roma condita, aut ab eadem à gallis capta, ut contendunt Plutarcus et Livius, ille, in Numa, hic in VI, I, Hist., nullibi apparet rationis vestigium.

praedicti status aequalitatis et libertatis: nul-  
libi commemoratur gens aliqua aut populus  
sine duce aut rege, cui subderetur. Et quantum  
quidem ad id quod ratio naturalis indicat, *nihil*  
*tam aptum est* (ajebat Cicero de Legibus, lib.  
3, n. 1,) *ad jus conditionemque naturae,*  
*quam imperium: sine quo nec domus ulla, nec*  
*civitas, nec gens, nec hominum universum ge-*  
*nus stare, nec rerum natura omnis, nec ipse*  
*mundus potest.... Omnes antiquae gentes regi-*  
*bus quondam paruerunt.... Ipsa verò prophana*  
*historia aegyptiorum et chaldeorum, qui om-*  
*nium hominum antiquissimi existimantur, prout*  
*ex Sincello à Manethone et Beroso, per annos*  
*36.525, fabulosè extendit*, adeò religiosè et  
honorificè de superioris hum. ac societatis sum-  
mis imperantibus in sua illa immensa et absona  
antiquitate loquuta est, ut eos in *deos; semi-*  
*deos*, aut *heroas*; et homines *reges* diviserit.  
*Deos* majores suos antediluvianos appellavit:  
principes, scilicet, ab Aloro seu Adamo usque  
ad Xisutrum, per quem Noachum intelligunt;  
*semideos* seu *heroas*, postdiluvianos, quorum  
primus fuit ipse Xisutrus seu Noachus: homi-  
nes verò *reges* eos, qui posteà regnarunt, eo-  
rumque princeps fuit Evechous: de quo **cum**  
**Africano** et Eusebio ait Sincell. p. 78: *παρ ημιν*  
*Νευρωδ, vel Νευρωδ apud nos (christianos)*

*iste Euechous Nemrod dicitur.* ¿Ubinam ergo fuerunt homines aequales et liberi, quorum neque ratio neque historia, sive vera, sive fabulosa, meminit?

LIII. Prodiit dudum in Hispania, anno, scilicet, 1822, perturbatrice ejusdem politica *Constitutione* vigente, chronographica quaedam omnium statuum seu regnorum mundi descriptio, cui titulas: *Mapa de la historia universal desde la antigüedad mas remota hasta el año 1821, arreglado á la Carta geográfica de Federico Straás, profesor de Historia en Berlin.* Lo dedica al colegio nacional de artillería J. Herrera Dávila. — Madrid, librería de Orea, calle de la Montera, año de 1821: in qua et parvula cruce signantur *Portlier* et *Laci*, status hispanici recentium perturbatorum, obitus: quasi de humana societate fuissent ii optimè meriti; et, quod ad antiquiores quidem spectat, saeculi XVI rebelles, *comuneros vulgo appellatos*, amissam tandem, ait, eorumdem libertatem in praelio de Villalar. At ¿quamnam illi tunc, queso, amisserunt libertatem? — Nom aliam certè quam qua rebelles renunt sublimiori ac legitimae suae potestati subdi. — Et ¿à qua potestate, et quando in praefatam amissam libertatem jure hereditario venerunt? — Nesciunt protsùs praedictae

descriptionis seu tabulae historicae auctores. Näm, quum omnium gentium primos summos imperantes designent, sinensium: *Yao et Schum*, ante dinastiam *de los Hias*; aegyptiorum, *Menem*; judaeorum, *Abrahamum*; graecorum, *Inacum*; assiriorum, *Nimrodom*; italorum, *Enotrum*; aliorumque varias dinastias incognitas aut incertas, nec horum potestatis primariam originem indicant, nec qua justa ratione ejusdem monarchica et communis regiminis forma alicubi in popularem transierit, produnt. Ex sacra Scriptura sumunt utique quod suo politico rebellionis sistematici non obstare arbitrantur: ut Abrahami, quasi principis judaeorum, nativitatem; Jesu Christi in mundum adventum, et alia nonnulla; at obumbrant et praetermittunt ea, quae ad rei ipsius, quam agunt, primam originem investigandam, m̄gis sunt necessaria: veluti, e. g., primi hominis formationem, et diluvium: à quibus omnes populi, status et regna necessario debuerunt sumere exordium. Haec, quasi revera in mundo non contigissent, aut, ea contigisse, valdè foret incertum et dubium, tenebris tecta, in praefata tabula silentio praemuntur. Quid de similis generis sistematicibus dici potest, nisi quod sunt gratis et sine fundamento conficta?

LIV. Objic. 2º Primi homines, antequām

civitates juraque proprietatis existerent, nomades erant et pastores, non habentes domos aut terram propriam; sed vagabantur moventes tentoria sua ab uno in alium locum: undè et Josephus lib. I, contra Apion., probaturus illos pastores, qui Ægyptum quondam tenuerunt, fuisse israelitas, ait: *καὶ γὰρ τοῖς αὐτοτάτῳ Προγονοῖς ἡμῖν τὸ ποιμαδίειν πατρίον ἦν: καὶ νομαδινούς ἔχοντες τον βίον, οὐτως εκαλούντο Ποιμενες.* Nam et antiquissimis progenitoribus nostris pascere fuit patrium: et, agentes vitam nomadum, indè vocabantur pastores. Quin autem haec vagandi libertas sine fixa sede ac ulla publica subjectione supremæ auctoritatis existentiam nexumque societatis excludat, non est à Deo immediatè institutum, nec eamdem cum hominibus habet antiquitatem jus politicum quantum ad haec essentialia et praecipua ipsius capita. Resp. Primi homines erant nomades et pastores, omnes; nego: erant nomades et pastores aliqui primorum hominum; concedo. Verum quidem est, pastoritiam vitam ab initio mundi valde usitatam fuisse; sed et ante eam fuit non minus exercitata agricultura: quae hominem uni alicui loco et fixae habitationi obstringit, ut in terra labore, et sudoris sui fructum ex ea desideratum expectet. Ità et ante Abelem, pastorem ovium, Cainum legimus

fuisse agricolam, cuius vivendi rationem aut artem exercuit etiā postea, generis humani secundus parens, Noachus. Nec oportet tribuere omnibus, quae non nisi alicui particulari professioni aut vitae instituto sunt propria. Quod autem Josephus de suae gentis, hoc est, de iudeorum progenitoribus generātim affirmet, fuisse pastores, non videtur adeò stricte sumendum, ut semper et ab omnibus illis aliam quamcumque vivendi professionem excludat. Immò et nec de duodecim filiis Jacob, ad quos verba in objectione proposita spectant, necessario id asserendum putamus. Nām, si somnia plerūmque de cognitis et usitatis occurrunt, agriculturae quoque dedisse illos operam, nonnullum indicium sunt ea Josephi verba, quae, Gen. 37, v. 6, dicebat fratribus suis: *Audite somnium meum, quod vidi: putabam nos ligare manipulos in agro: &c.* Quumque et aliae etiā artes ad agriculturam requirantur, iisque usus jām fuerit corām filiis suis in Arcae fabricatione Noachus, nullo modo concedendum est, omnes omnino iudeorum progenitores fuisse mere pastores. Dixerunt quidem filii Israel, ex consilio Joseph, Pharaoni, Gen. 47, v. 3. *Pastores ovium sumus servi tui, et nos, et patres nostri. Ad peregrinandum in terra venimus &c.* Verūm hujusmodi consilium dedit eis sanctus

Patriarcha, ut, segregati ab aegyptiis, qui omnes quoscumque pastores ovium detestabantur, possent pacificè in terra Gessen habitare: quod et eis facilè fuit concessum.

LV. Sed nec nomadicum aut pastoritum vitae institutum societati publicae aut potestati civili prorsùs opponitur: quum civitas aut res publica non tam ex dominibus ac lapidibus coalescat, quam ex hominibus, communis auctoritatis ac legum vinculo colligatis; sive in fixo illi domicilio permaneant unique terrae tractui sint addicti, sive ex una in aliam regionem, quacumque justa causa, vagentur. Dico autem, justam debere esse causam, cùr multi homines, prioris, quam profitebantur, abjecta vitae ratione, novam societatem ineant, atque ab uno in alium locum ob aliquem finem vagentur, quia, quom omnes illi jure naturali atque politico alieni publicae societati praexistenti fuerint jam anteà adstricti, non possunt sine justa causa ejusdem naturalem nexum, obligationesque ex eo enatas, desserere. Neque convenienter dici posse censendum est, fuisse homines nomades, antequam civitates juraque proprietatis existerent; eo quod ambo haec, quantum ad earundem rerum substantiam, semper extiterint. Quamquam enim civitatem, materialiter acceptam, nemo ante Cainum, ab

Adamo edictum, aedificasse sciamus, sumpta tamen civitate pro habitatione hominum societatis vinculo colligatorum, prima mundi civitas fuit ipse Paradisus: in quo summus imperans erat primus homo: eique, quasi inferior, et populi personam gerens, obediebat Eva. Jura verò proprietatis non ab alio accipere primum homo potuit, nec re ipsa accepit, quam ab omnium Creatore et Domino, qui est Deus. In communi quidem, quum, postquam masculum et foeminam creasset eum, praeesse ipsum voluit *piscibus maris et volatibus coeli, et bestiis universaeque terrae.... deditque ei omnem herbam afferentem semen super terram.... ut esset eidem in escam;* in particulari autem, et prout proprietas, servatis tamen aequitatis et justitiae regulis, excludit etiam alios ab ejusdem rei possessione et usu, quum post peccatum futurum decrevit, *ut homo in sudore vultus sui vescetur pane.* Sicùt enim sudor proprius et solius est hominis sudantis et laborantis, ita etiam panis qui sudore acquiritur, et quo erat deinceps ei vescendum.

LVI. Objic. 3º Silvaticum saltēm sive agrestem hominum statum statui civili antecessisse, existentia multarum gentium, in tām misero statu adhuc degentium, perspicuē demonstrat. Sicūt enim lucem praecedunt tenebrae, itā et

imperfectionem seu miseriam status silvatici primitivi praecessisse perfectioni et felicitati hodierni civilis status, ipsa perfectibilitas seu tendentia naturalis hominis ad sui perfectionem ostendit. *Silvatici autem sunt populi barbari* (itā eos definit Encyclopaedia, artic. *Sauvage*), *qui, nullam stabilem et fixam stationem habentes, sine legibus, sine politia, sine Religione vivunt*: nūdē aequales et omnīnō liberos natura eos fuisse, esseque adhuc hodiē, necessario sequitur. Neque libertatis jactura, quam in statu civili patiuntur, admississent unquam, nisi ob graviora mala vitanda amplioraque acquirenda bona. Tantum ergo abest, ut jus politicum quantum ad publicae auctoritatis existentiā et ordinem societatis eamē cum hominibus habeat antiquitatem, sitque à Deo immediate institutum, quin potius status primitivus publicus naturalis hominis sit silvaticus seu agrestis: *sine legibus, sine politia, sine auctoritate, sine subjectione ulla.*

LVII. Respondeo, multa pseudo-philosophorum praeteriti saeculi quasi effata aut axiomatica in hac objectione comprehendi, quorum deceptio aut falsitas longiorem flagitaret disquisitionem. Ea tamen, in quantum argumenti ratio et locus patiuntur, summātīm et paucis sunt ordine diluenda. Atque quod in primis penitus

negandum est , eo saltē sensu quo illi sumunt ,  
 est , ea *perfectibilitas* seu *tendentia naturalis*  
*hominis* ad suam adsequendam perfectionem:  
 qua et omnino ab initio caruisse , et eam nūanc  
*civilizationis* beneficio ac progressu consequi  
 existimant. Non enim id intelligunt de naturali  
 appetentia beatitudinis in communi: quae aliun-  
 dē non impletur tamen , nisi per Christi gra-  
 tiā supernaturalem , quam illi aut nesciunt  
 aut praetermittunt ; sed de *perfectibilitate* seu  
 perfectione quam homo propriis suis viribus  
 comparare nititur , et naturalem propterā vo-  
 cant. Neque perfectionem hanc in veris bonis ,  
 quae ad animum et mores spectant , et ratione  
 adquirenda esset , collocant ; sed in apparentibus  
 tantum , et quae rectae rationi potius interdūm  
 opponuntur : veluti in divitiis ; in voluptatibus ;  
 in potentia ; in industriae scientiarumque natu-  
 ralium progressu ; in libertate quidvis et opinan-  
 di et agendi ( quam ad civilizationem pertinere  
 putant , et irreligionis nomine melius appella-  
 rent ), in aliisque demum vanae sue philosophiae  
 illusionibus : quae omnia , quam inordinatas ho-  
 minis affectiones , quas *passiones* vocamus , fo-  
 vere nata sint , miserum et pravum potius  
 eum redeunt quam perfectum. Homo , sibi so-  
 li relictus , ad corruptionem barbariemque ten-  
 dit , non ad perfectionem : ad quam pervenire

nequit nisi per Eum ipsum qui fecit illum.

LVIII. Errant itēm in hominis assignanda origine et natura : de quibus duobus capitibus adēc aberrantia , inordinata et omni prorsū probabili ratione destituta scripserunt , ut telet ea seriō refellere ; ne rebus indubīis ac perspicuis per ea , quae quibusdam nimis fortè perspicua videbuntur , demonstratis , dubitationem ac obscuritatem potius quam lucem afferamus . Praeterire tamen non possumus falsitatem consequotionis , quam indē eliciunt : societatem , videlicet , humanam ab imperfecto ad perfectum processisse . Nām quum nunquām probaverint , fuisse eam hominis , à quo imperfectum omne procedit , institutionem ; quinimò oppositum nos et ex Scriptura et ex naturali ratione demonstraverimus , corruit firmamentum , cui eorum generalis illa predicta sententia inititur . Tenebrae praecedunt quidem lucem , quando haec à causa particulari et deficiente producitur ; non autem quando à prima et omnipotenti , cuius perfecta sunt opera , primo creatur . Hinc (ut P. Ventura , in *Comment. de Jure publico eccles.* lib. I , cap. 3 , §. XIII , n. 4 ; quamquām nescio , àn hoc opus ut jām omnimò publicum haberī possit , et comitis de Maistre , *Soirées de Saint Petersbourg.* tom. I , soir. 2 , sententiam amplectamur ) silvaticus

homo non est, nec esse potest, nisi progenies parentis, qui ob insigne aliquod nobis ignotum scelus, aut valde corruptam ac depravatam vi-  
tae rationem, ab arbore seu trunco verae ci-  
vilitatis fuerit cum familia avulsus; atque anathema, quo fuerit de coelo ictus, ad nepotes et posteros, tanquam novum quoddam origina-  
le peccatum, media educatione transmissit. Cor-  
ruptionem vero hac in eadem progenie, ut assolet,  
majori semper prolapsionis vi ac celeritate per-  
crebescente: haec progenies in extremum dedecus,  
pravitatem, miseriam, omniumque penè hominis  
facultatum privationem deducta, ea demum  
est, quae *silvaticus* homo appellari consuevit.

LIX. Quapropter silvaticorum hominum linguae aliarum linguarum non initia, sed reli-  
quia et quasi ruinae sunt. *Plura namque idio-  
mata* (ait Mr. de Humbolt, *Munumens des  
peuples indigenes de l'Amerique. Introd.*) *quae  
hodiè ad barbaros populos pertinent, reliquiae  
uberrimarum linguarum et magnam culturam  
indicantium esse videntur.* Necessum enim  
est, omnem cujuscumque familie aut populi  
moralem corruptionem proportionata idiomatis  
corruptione manifestari. Ideae namque, in qui-  
bus hominis vita intellectualis seu ratio consistit,  
depravari aut deleri nequeunt, quin et voces,  
ideis respondentes, vel depraventur quoque,

vel penitus deleantur. Nulla ergo alia de causa *silvaticus* homo rudem, inopem et impeditam loqulam emittit, nisi quia, omnibus penè ideis et veritatibus destitutus, rudi, inopi et impedita ratione similiè utitur. Neque accurata est hominis *silvatici* definitio, quae nobis ex Encyclopoedia objicitur. Vix enim populi censendi sunt, qui omni prorsùs ordine, politia et legibus carent: ut et iidem scriptores, inconvenièr, ut assolent, in eodem articulo addunt: *Hujusmodi populorum unaquaque tribus, aquis loca quae circumstant, occupantibus, intrà angustos terrae limites conclusa, vivit, crescit et parvam nationem efformat.* { Quomodò enim nationem, etiàm parvam, efformare possunt homines sine ullo ordine, sine politia ulla, sine ullis legibus: quae sunt cujusvis nationis essentiale vinculum et constitutivum? Dato namque, et non concesso, quod predicti pseudo-philosophi seu sophistae potuerint benè sibi eos effingere, mutuo ac puro amore inter se devinctos, tantaque naturali aequitate praeditos, ut maxima in suam, quantumvis imperfectam, societatem crimina nunquam admittant; { qui tamen fieri potest, ut de silvaticis id credatur, qui, inordinatissimis validissimisque omnium hominum affectionibus obnoxii, iisdem non tam agere quam agi censemur? Suam ergo silvatici

homines habent politiam et suas leges; quamvis imperfectas ac depravatas: sicuti imperfecta ac depravata est etiam ratio qua utuntur, et qua nihilominus multum brutibus animantibus antecellunt.

LX. Verum quod ferri multò minus potest, est, illa alia consequentia, qua ex particulari ac misera *silvatici* hominis conditione actuali, multi non solum conjici, sed et certo colligi posse sibi persuadent, naturalem hominis statum non esse publicae societatis, politicum seu civilem; sed omnimodae libertatis, aequalitatis ac independentiae: ita ut in eo sui juris homo sit, neque actiones unius ab alterius voluntate pendant. Unde quum hujus libertatis, aequalitatis ac independentiae jura *impraescriptibilia*, ut potè naturalia, credantur; status verò civilis, in quo ea certis limitibus definiuntur et includuntur, ex hominum consilio, voluntate et facto proprio ortus *adventitiusque* vocetur; clarumque praeterea esse urgeant, omnia humana mutationibus esse obnoxia et ab iisdem hominibus perfectibilia, fieri nullo modo potest, quin politicas innovationes non appetant, continuoque ad fictitiam pristinam illam libertatem non asperent. Et ecce, commotionum statuum rebellionumque, quae funditus est evertenda, aeternam radicem.

LXI. Objie. 4º Dent mihi lectores, si placet, ut in politica etiàm disputatione angelici Praeceptoris, amplioris explicationis gratia, nomen et auctoritatem assumam. Sanctus igitur Thomas huic conclusioni opponitur. Nàm quin (1.ª 2.ª, quaest. 90, art. 3), inquirat: *Utrum ratio cuiuslibet sit factiva legis, sic respondet: Respondeo dicendum, quod lex propriè primo et principaliter respicit ordinem ad bonum commune. Ordinare autem aliquid in bonum commune, est, vel totius multitudinis, vel alicujus gerentis vicem totius multitudinis. Et ideo condere legem, vel pertinet ad totam multitudinem, vel pertinet ad personam publicam, quae totius multitudinis curam habet; quia et in omnibus aliis ordinare in finem, est ejus, cuius est proprius ille finis. Condere igitur leges non est summorum imperantium; sed populi aut totius multitudinis: vel principis, in quantum populi vices gerit; adeoque nec ex summorum imperantium ratione aut arbitrio pendet jus politicum quantum ad leges positivas et particulares, ex quibus coalescit.*

LXII. Resp. Et D. Thomas loquitur de *facto et actuali exercitio facultatis condendi leges; concedo: loquitur de jure, origine et prima causa hujus facultatis; nego. Sanè quin*

sanctus Doctor in art. 1º hujus quaestio[n]is, et in primo pariter quaestio[n]is decimae-septimae, statuisset, imperare et edere legem esse opus rationis, praesupposito actu voluntatis, progeditur et inquirit in hoc articulo tertio, cujusnam rationis et voluntatis sit actus. Habet enim in societate quilibet homo suam propriam et particularem rationem et voluntatem. Quumque legis objectum et finis sit bonum commune, ratio antem et voluntas privata et particularis cuiuslibet individui maximè tendant in bonum particolare et privatum, non potest haec ratio efficere legem; sed ratio tantum communis et publica: quae reperitur vel in tota communitate, vel in illa persona publica, ad quam spectat imperare toti communitati. Nec dicere, hanc personam publicam seu summum imperantem totius multitudinis vicem gerere, est dicere, ab hac multitudine accipere eum auctoritatem imperii seu condendi legem; sed esse eum in monarchica regiminis forma, quod tota multitudo aut populus in democratica. Sic ut quum dicimus superiorem aliquem judicem vicem gerere sui inferioris, quando ad se avocat aliquam hujus causam, munusve, quod huic competit, per se explet. Aut quum dicimus, supremum alicujus exercitus ducem ejusdem exercitus animae vices gerere aut ipsius animam

esse , eo quod illius actionum principium est , sicut anima hominis est principium earum actionum , quae per corpus fiunt.

- LXIII. Potuisset utique sanctus Doctor ad quaestionem , quam sibi proposuerat , merè negativè respondere , dicendo : rationem cuiuslibet individui efficere non posse legem , eo quod privata et particularis ipsa sit , lex autem debet esse publica et communis ; maluit tamen positivam resolutionem etiam exprimere , ut ostenderet , communem se , juxta morem , opinionem sequi : qua credebatur et creditur , tam monarchici regiminis formam , quam aristocratici aut democratici esse posse legitimas . Cujus tamen legitimatis rationem et causam non voluisse hic inquirere , ex solutione ad secundum objectionem appareat . Quum enim Aristotelem sibi objiciat , dicentem , intentionem legislatoris esse inducere homines ad virtutem , palamque aliundè esse , quemlibet hominem posse alium inducere ad virtutem legemque propterè edere , respondet , personam privatam non posse inducere efficacitè ad virtutem , eo quod non habeat vim coactivam , quam debet habere lex , et *habet multitudo vel persona publica , ad quam pertinet poenas infligere* . Näm , si haec ratio et doctrina valeret ad civilis potestatis legitimatem probandam , ex vi coactiva ea desumeretur :

qua doctrina nihil est absurdius, neque ad rebelliones statuumque societatis perturbationes excitandas accommodatius. Ad majorem autem cognitionem sententiae D. Thomae de hac suprema auctoritate civili, legi potest, in praecitato opusculo: cui titulus *Origen de los errores revolucionarios &c.*, cap. X, et ult. tom. 2.

## DE LEGIBUS.

LXIV. **D**efinitur lex: *regula juxta quam actiones nostras liberas determinare tenemur: sive cum D. Thoma 1.<sup>a</sup> 2.<sup>ae</sup>, quaest. 90, art. 4, rationis ordinatio ad bonum commune, ab eo, qui curam communitatis habet, promulgata.* Prima omnium legum, et à qua omnes aliae verè et propriè legis rationem et naturam desumunt, est lex aeterna, quae nihil aliud est, quam ipsa ratio gubernationis rerum in Deo, sicut in principe universitatis, existens. Dicitur aeterna, quia est ipse Deus, qui est aeternus; quum in ipso nec ratio, nec voluntas, nec coetera attributa aut proprietates et actus realiter distinguantur, eo quod sit simplicissimus et cujuscumque expers compositionis. Distinguuntur autem per mentem, sive secundum nostrum

concipiendi modum, à Providentia dupli ratione: prima, quia lex aeterna respicit per se primo bonum commune universi; Providentia bonum particulare uniuscujusque creaturae. Secunda, quia lex aeterna ex propria ratione aut natura vim obligandi habet; Providentia verò nullam importat obligationem. Undè comparatur Providentia ad legem aeternam sicut conclusio particularis ad principium à quo procedit: aut sicut consequens ad antecedens. Hinc D. Thomas (quaest. 5, de Verit. art. 1, ad 6): *Providentia in Deo non nominat propriè legem aeternam, sed aliquod ad legem aeternam consequens. Lex enim aeterna est consideranda in Deo, sicut accipiuntur in nobis principia operabilium naturaliter nota, ex quibus procedimus in consiliando et eligendo, quod est prudentiae sive providentiae. Unde modo se habet lex intellectus nostri ad prudentiam, sicut principium in demonstratione: et similiter etiam in Deo lex aeterna non est Providentia, sed Providentiae quasi principium.*

LXV. Datur igitur in Deo haec lex aeterna, quia datur in eo Providentia, quae ad legem comparatur sicut conclusio particularis ad generale principium. Ex generalibus siquidem regulis dedit Providentia, quid in casibus

particularibus sit faciendum. In eo autem in quo ponitur conclusio, debet etiā poni principium ex quo illa conclusio inferatur; quum ii, qui careant primis principiis sive speculabilibus sive practicis, careant etiā eorum conclusionibus. Est etiā lex aeterna verē et propriē lex; quum ex ejus participatione aliae omnes leges verē tales dicantur; eique tanquam regulae et mensurae debeant accommodari. Nec opponas, deesse ei promulgationem: nāni promulgatio fit et verbo et scripto; et utroquē modo lex aeterna habet promulgationem ex parte Dei promulgantis: quia et Verbum divinum est aeternum, et Scriptura libri vitae est aeterna. Sed ex parte creaturae audientis aut insipientis non potest esse promulgatio aeterna. Itā D. Thomas (2.<sup>a</sup> 2.<sup>ae</sup>, quaest. 9<sup>1</sup>, art. 1, ad 2.). Itā et ab aeterno fuit etiā in Deo imperium, quum hoc essentialiter et à natura ei competit; quamvis nemo foret ab aeterno, cui imperaret.

LXVI. Ex hac lege aeterna emanat in hominibus lex naturalis et positiva, utraque divina: et temporalis seu participata. Lex naturalis consistit in dictamine intellectus practici, non praecissè indicantis et ostendentis bonum et malum; sed imperantis etiā et obligantis. Unde lex naturalis, prout est in nobis, hoc modo explicari potest aut definiri: *Dictamen rationis*

*practicae, ab aeterna lege proveniens, quo dirigitur et obligamur, ad omittendum vel agendum ea, quae, solo naturae lumine, cognoscuntur tanquam prohibita vel paecepta.* Lex positiva, quae revelata propriè etiā dicitur et supernaturalis, ea est, quae in veteri Testamento aut novo continetur; et in veterem et novam proindè dispescitur. Dixi autem legem positivam divinam revelatam propriè et supernaturalem vocari, quia, lato quodam sensu sumpta ac impropriè loquendo, lex naturalis etiā revelata dici potest: in quantum ratio humana habilis et expedita ad cognoscendum non redditur, nisi sermonis aut verbi ministerio; quod infantili aetate à parentibus, nutrientibus seu coram loquentibus accepimus: iisque eodem prorsus medio à suis institutoribus receperunt, sicque usque ad primum hominem retrò ascendendo, universum genus humanum, in ipso homine primo tanquam in primo magistro comprehensum, à Deo revelante desumpsit.

**LXVII.** Ex predictis divinis legibus, naturali et positiva, exurgit lex humana, individuali ac publico hominum ordini necessaria: quae vel ecclesiastica est, vel civilis. Illa, Ecclesiae Praelati gregem Christi ad debitum Dei cultum finemque dénum aeternae beatitudinis dirigunt et gubernant. Hac, principes et

supremi rerū publicarū magistratus, quicunque illi sint, cives ad pacem et bonum commune societatis politicae assequendum in officio continent. Verū quod in hac re, quam ad populo-rum tranquillitatem et felicitatem assequendam suscepimus, nāgis interest, est, nūm hae le-ges politicae in foro conscientiae obligent. Im-possible enim videtur, homines exterius legum observantiam virtutemque, quibus societatis pax securitasque consistit, colere, nisi interius etiām credant, ad id obligari. Hujus igitur obligatio-nis communis opinio, seu cognitio potius ac persuasio, ad rerū publicarū conservationem et perfectionem est prorsū necessaria. Hanc ve-ritatē Judas Galilaeus, judaici status publicus perturbator, impugnavit; et sicūt in act. App. cap. 5, v. 37, legitur, *Populum post se aver-tit.* De eo sanctus Hyeronimus (in caput 3, epist. ad Titūm), ita scribit: *Surrexit in die-bus census Judas Galilaeus, qui inter caetera, hoc quasi probabile proferebat ex lege: nullum debere Dominum nisi solum Deum vocari; et eos qui ad templum decimas deferrent, Cae-sari tributa non reddere.* Quae haeresis in tantum creverat, ut etiām pharisaeorum et mul-tam partem populi conturbaret; ita ut ad Do-minum quoque nostrum referretur haec quaestio: *licet Caesari dare tributum, an non?* Huic

similem errorem docuerunt Calvinus, lib. 4,  
Instit. cap. 10, §. 5. Lutherus, lib. de Libert.  
christian. et in Comment. epist. ad Galat. cap.  
4, ad eumdemque errorem nimis accessit etiam  
Jo. Gerson. *De vita spirituali animae*, lect. 4.  
Sit ergo catholica

## TERTIA CONCLUSIO.

*Leges politicae cujuscumque status cives obligant in conscientia.*

LXVIII. Prob. Omnis homo legi Dei aeternae tenetur subjici in conscientia, atqui hoc ipso tenetur etiam subjici legibus politicis sui status, ergo: Prob. min. Politicus ordo cujuscumque status à lege Dei aeterna est praescriptus, atqui talis ordo ex propriis ejusdem status legibus earumque observantia pendet, ergo. Sanè aeterna Dei lex, qua statuitur et praecipitur, omnia esse ordinatissima, ordinem maximè in politicis societatibus servandum esse praescribit; quum sine eo non status aut societas, sed societatis confusio ac perturbatio seu potius dissolutio existeret: quod de Sapientia, Sanctitate ac Prudentia supremi omnium Conditoris et Legislatoris nefas est cogitare. Hic autem ordo, cuius absolutam necessitatem naturalis ratio dispicit, sacrae litterae à Deo statutum jam fuisse, ut diximus, diserte confirmant. Loquendo enim de summis imperantibus, seu, ut eos vocat Apostolus, de sublimioribus potestatibus, ait ipse ad romanos: *Quae autem sunt à Deo ordinatae*

*sunt.* A Deo, inquam, non ab ipsis hominibus inventa, quasi in remedium adversus mala in humanam societatem à perturbatrice libertate naturali invecta. Ut clarius inde innescat Jacquierii aliorumque nimis errori proxima opinio, putantium, homines societatis civilis auctores fuisse; in qua adversus gravissima mala et incommoda societatis naturalis aequalitatis et libertatis, quaesierunt remedium. Sic enim societatis civilis aut juris politici originem probat ac necessitatem: *Adversus haec gravissima (anarchiae, scilicet, seu libertatis naturalis) mala in societate civili supremaque auctoritate quaerendum erat remedium.* Quasi hujus status supremaeque ejusdem potestatis institutio, non Dei, sed ipsorum hominum fuisset consilium.

LXIX. Hujus civilis societatis divinam institutionem obligationemque adeò inde enatam supremae ejusdem potestatis ex conscientia obediendi, non solum recta ratio, sed et Scriptura variis in locis expressè docet: ut in praecitata Divi Pauli Epistola ad Roman., cap. 13, legimus: *necessitate subditi estote, non solum propter iram, sed etiam propter conscientiam.* Quasi dicat, non solum timore poenae, et quia gladium portat: utpotè minister Dei, vindicta in iram ei qui malum agit; sed etiam propter conscientiam, et quia id justum est et voluntati

Dei conforme. Quod Petrus quoque in prima sua Epistola monebat, inquiens: *Quia sic est voluntas Dei, ut, benè facientes, obmutescere faciatis imprudentium hominum ignorantiam.* Eorum, nempè, qui, initio praedicationis evangelicae, christianos traducebant tanquam politicae societatis perturbatores, et humanis legibus imperatoribusque inobedientes. Hoc, praeter jàm praecitatum Hyeronimum, testatur etiàm Chrisostomus (Homil. 23, in Epist. ad Timot.) his verbis: *Plurima tunc temporis circumferrebat fama, traducens Apostolos veluti seditiones, rerumque novatores; qui omnia ad evertendas leges communes et facerent et docerent.*

LXX. Ad hanc refellendam calumniam multa de obedientia principibus debita, prioribus Ecclesiae saeculis, scripserunt Patres; ut S. Pollicarpus; S. Justinus; Tertulianus; et alii: et quidem optimè. Nàm ipse Christus Dominus civilis potestatis divinam originem et auctoritatem fatetur, dùm Pontio Pilato respondit (Joann. 19, v. 11.): *Non haberes potestatem adversus me ullam, nisi tibi datum esset desupèr.*

LXXI. Objicies cum Gersonio loc. cit. Potestas principum, quantumvis potens et suprema sit, est merè temporalis et externa; immò et nec ejusdem Ecclesiae potestas judicat de internis.

**S**olus autem Deus potest eripere gratiam, quum solus ipse possit eam dare: utpotè solus habens claves vitae et mortis aeternae: qui aperit, et nemo claudit; claudit, et nemo aperit. Adeòque nulla transgressio legis naturalis aut humanae, ut naturalis est vel humana, est de facto peccatum mortale; quum lex naturalis et humana, ut tales sunt, non possint attingere ad cognitionem aeternitatis in poena vel praemio. Ex quibus hoc potest effici argumentum. Illae leges non obligant in conscientia, quarum transgressio, quamvis gravissima sit, ad peccatum mortale nequit attingere; atqui ex predictis sic se habent leges politicae cuiuscumque status, ergo.

LXXII. Resp. nego min. et ad ejus praecedentes probationes, distinguo in primis. Potestas Principum est mere temporalis et externa ratione objecti, conc. ant. Tota enim versatur circa personas, res et actiones externas et temporales: ratione obligationis quam inducit; nego ant. Quum enim à divina potestate derivetur, illius virtute obligare potest ad culpam etiàm mortalem: undè transgressor, eidem resistendo, damnationem adquirat, juxta præfatum Apostoli testimonium. Ea autem est hominis conditio, ut actus ejus interni multipliciter ad externos comparentur, eosque nati sint dirigere et promovere: ita ut vix aliquis invenietur, in quo

vitae exterioris ordo interiori sententiae opinio-  
numque proprio sistemati non respondeat; quod  
non peterit quin interdùm prodat publicumque  
faciat: et ad pacem quidem tranquillitatemque  
reipublicae inducat, si bonum illud sit, ad de-  
fectionem verò et rebellionem, si pravum. Nec  
externus societatis ordo ullibi convenientèr con-  
servari potest, nisi cives ex conscientia legibus  
optemperandum esse credant: iisque, quantum  
fieri potest, ex interiori etiàm sententia se ac-  
commoden. Dixi *convenientèr*, quia ordo coac-  
tus, et qui cives ad virtutem probitatemque  
non dirigat, non est dicendus ordo sed horror  
et tirannica oppressio. Undè neque civilis su-  
prema potestas dicenda est merè publica atque  
externa; nec externum tantum bonum societatis  
eiusdemque pax, ad quam potestas illa ordina-  
tur: agitur enim de actionibus humanis, quae  
legibus diriguntur, ut humanae sunt. Hoc est,  
prout à principio seu potentia libera emanant  
et cum cognitione finis: quae ambo occulta om-  
nino sunt atque interna.

LXXIII. Est autem duplex vis in legibus  
humanis consideranda: directiva et coactiva. Et  
quantum quidem ad vim coactivam, quae po-  
sita est in poenis, quibus in transgressorès  
animadvertiscuntur, non utique pertingit potestas  
humana ad actus internos judicandos, in quibus

de transgressione legum homines convinci non possunt nec puniri; pertingit verò ad eos prohibendos quantum ad earumdem legum vim directivam, quae ex divina ordinatione bonum morale societatis intendit: atque hac ratione ligant cives etiā in conscientia leges politicae. Verum quidem est, solum Deum posse hominem gratia privare, quia solus ipse dat eam; sed hoc intelligendum est tantum per se et efficienter. Ad hoc autem ut aliquis alterum obliget in conscientia, et sub culpa etiā mortali, sat est, quod aliquid ei praecipiat auctoritate sibi à Deo collata: quod, si voluntariè non impletat, Deus illum gratia sua destituat: sicut si quis legem proregis fuerit transgressor, indèque à gratia regis excideret.

LXXIV. Fallacitas etiā in proposita objectione appareat, ubi lex naturalis non nisi pro humana lege sumitur. Näm lex naturalis est etiā lex divina, si ad Legislatorem ejusque rationem et auctoritatem referatur; quamvis non sit nisi humana, si ad tabulam, hoc est, si ad mentem aut cor hominis, in quo scripta est, respiciatur. Unde attingit quidem recta ratio ad immortalitatem animae et infinitam Dei dignitatem et justitiam homini proponendam; quod satis est, ut ipse per eam sufficientem aeternitatis in poena vel praemio cognitionem habeat.

Nec praedicta aequivocatio sive ambiguitas, qua in objectione lex naturalis et humana *reduplicativo*, ut ajunt scholastici, sensu sumitur, hoc est, prout mere naturalis est et humana, parvi momenti censenda est: indè enim sumunt exordium omnes errores sociales sive morales Europae, et, ut verius dicam, totius orbis. Ex eo, scilicet, quod fiat humanum, quod est revera divinum. Nam quum omnia humana mutationibus et defectibus obnoxia sint, et ab hominis, eorum auctoris, voluntate pendeant; non autem divina, quae sunt aeternae veritatis et immutabilia: si societas humana et jus politicum, quod ad ejusdem societatis conservacionem et ordinem necessario requiritur, humanae institutionis ponuntur, fieri non potest, quin homines ad ea corrigenda et perficienda continuo aspirent: et ecce perturbationum ac commotionum politicarum perpetua radix. Lex humana, etiam ut humana est, vim obligandi in conscientia habet; quia suprema civilis potestas, ejusdem legis effectrix, ad bonum commune reipublicae promovendum, etiam ut humana est, à Deo est ordinata.

LXXV. Quid verò si lex humana legi naturali divinaeque adeò voluntati contradicat? Respondeo cum Ludovico Baylli, Hobbesii sententiam refellente (Tract. de vera Religione,

1<sup>a</sup> parte, cap. 2,). *Nisi evidentè et sine examine pateat, legem principis esse naturali adversam, qualis esset, si tirannus praeciperet, ut quis patrem vel matrem necaret, legi semper obediendum est. Insuper, etiam cognita legis perversitate, non turbabitur tranquillitas publica. Licet enim tali legi obtemperandum non sit, tamen rebellare nunquam licet.* Et optimè quidem. Näm paucis transcribit hic scriptor complectiturque hoc loco christianaë dōctrinae summam, tam de obedientia Principibus, jure naturali, debita, quam de politica à civibus, ad status tranquillitatem servandam, conversatione tenenda. Ut nostrae etiam inde sententiae confirmationem sumamus, qua in medium continuo adducimus, eumdem esse auctorem, idemque hac in re praescribere omnibus hominibus legem naturalem, ac fidelibus praescribit revelata in Evangelio per Christum. Hujus promulgationem prohibuerunt sanè, ipsius initio, Apostolis principes sacerdotum et omne judaorum concilium, stricte eis praecipientes, ne docerent neque praedicarent in nomine Christi: qua lege nihil injustius in mundo esse unquam potuit. Responderunt certè Apostoli, dicentes: *Obedire opportet Deo màgis quam hominibus:* nec obtemperarunt. At ; rebellarunt tamen, nec rebellandum unquam docuerunt?

Nequaquam. Publicae utique suae potestatis decretum, expresso Dei praecepto oppositum, violarunt; at suo damno quidem. Nam, caedi hac causa sustinentes, ibant gaudentes à conspectu concilii, quoniam digni habiti fuerant pro nomine Jesu publicae flagellationis contumeliam pati. Super hunc obedientiae et patientiae Spiritum fundata est Ecclesia, eumdemque filiis suis perpetuo docet.

LXXVI. *Ubi ergo adest populis fidejussio, pignus aut testimonium, quo, in quantum fieri potest, securi sint, suos principes justas edituros leges, nec ipsos in servitutem redacturos, apertos et crudeles tirannos effectos?* Nam et huic gravissimo ac communi societatis malo, credibile non est, Sapientissimum aequa ac Sanctissimum Legislatorem ac Provisorem, Deum, praetermississe remedium. — *Nec utique praetermissit; sed clarissimum potius et omnium oculis manifestissimum, in ipsa lege naturali suaeque Providentiae ordine sapientissimo posuit.* *Quaerent verò hodierni politici reformatores aut perturbatores, quomodò id fiat?* — **Audiant quomodò.** Atque prae oculis in primis habeant, nemini summorum imperantium concessisse Deum absolutam et à se independentem auctoritatem, nec potestatem; sed justa decernendi tantum. Nec timori boni operis

principes ab eo esse constitutos, sed operis mali: ministros ejus populis datos tantum in bonum. Hoc est, nullas eorum leges esse veras leges, nec obligare in conscientia, juxta communem omnium sententiam, nisi legis naturalis rectaeque rationis regulae sint consentaneae: quae, quum omnibus hominibus aequae patere credatur, intra terminos valde angustos ac definitos eorum suprema potestas manet inclusa; in iis praesertim, quae ad primaria ejusdem legis naturalis principia facile reduci possunt. Non quod populi, ut saepè diximus, de harum legum justitia aut injustitia judicare possint; sed quod multum principes sive improbos sive probos hoc in officio contineat: sicut et in officio etiàm valde contineret legatum ad aliquos et ob aliquam rem à principe missum, si nulla ei instructio aut potestas reservata daretur; sed palam esset omnibus, ad quos judicandos pergeret, tota delegata ei facultas.

LXXVII. Sciunt namque principes, et nimis certè tristi experimento sciunt, homines, suae pravae propensioni relictos, nimis libertatem amare, subjectionem verò et obedientiam ut plurimum gravatè ferre. Quod si ità res se habet, etiàm dum recta ratio subjectionem necessario praescribit, quid erit, quaeso, dum recta ratio legis injustae verum defectum

ostendet? — Quid? — Legislatoris contemptus, et, quae ei est valde proxima, inobedientia et rebellio. Non, inquam, quod populis rebellare unquam liceat; sed quia probabile est, in praedita hypothesi, rebellaturos. Sic ut, quamquam peccare nunquam licet, ferè tamen certum est, hominem infirmum, et in proxima occasione aut vehementi tentatione positum, peccaturum. Atque haec quidem permissio peccati, quam Deus ob bona inde eventura sapientissimo consilio providet et misericorditer vult, intrà ordinem sanè cedit Divinae Providentiae; ut summos etiam imperantes, non solum durissimi judicii saeculi futuri timor à malo coercent, sed et studium quoque favorablem in praesenti saeculo Dei Providentiam habendi, ad bonum impellat. Nam vel humana societas casu tantum nullaque Dei Providentia regitur, quae philosopho indigna prorsus sententia est, vel qui eam, justas eidem leges ferendo, ad virtutem ducunt, Deum, essentialiter justum ac sanctum, necessario propitium habent et adjutorem. Praeterquamquod, licet impii principes nonnulla interdum nobis temporali felicitate frui videantur, certius tamen est, quod doctor eximus ajebat, jussisse Dominum, et sic esse, ut poena sua sibi sit omnis animus inordinatus.

LXXVIII. Deprehendant ergo demum pseudopolitici suum errorem; et tam principum quam populorum communem pacem ac foelicitatem non in humanis quibuscumque collocent institutionibus, sed in lege ipsa Dei ejusque Providentiae altissimo ordine: cui monarchicum politicum regimen apud homines, ab eorum primo, constituere placuit. Regimen, quod ab eo, quod ipse in omnes creaturas exercet, desumptum ac participatum, non nisi iis, qui subjectionis jugum, in poenam primi peccati universo generi humano impositum, excutere volunt, intolerabile ac grave videtur. Regimen, cuius, quum suprema potestas cum aliis regiminum formis, humanis adinventionibus, temperetur, destruitur ac enervatur. Regimen, quod unicè natum est respuplicas ad commune bonum, hoc est, ad pacem, unitatem ac virtutem dirigere: si tamen virtutis nomine, non privatius amor, ambitus aut superbia; sed vera humanitas et amor publicus veritatis, legi Dei rectaeque rationi consentaneus, accipiatur. Fauxit Deus, ut, magnorum principum juneta virtute, falsa libertatis specie aliquisque animi humani perturbationibus, quae non nisi in malum ducunt, eliminatis, salutaris eis doctrina, quae sola rerumpublicarum pacem foelicitatemque efficere potest, succedat!

## COROLLARIA.

## PRIMUM.

**LXXIX.** Sequitur ex praefata doctrina, generalem quamdam esse inter omnes homines societatem à Deo institutam , communique legi vinculo communitam, cuius naturam et essentiam societates omnes particulares, respublicae aut status civiles apud se retinent : sicùt et in aliis rebus omnibus retinent species quidquid ad sui generis essentiam spectat. Quod primum autem ad humanam quamcumque societatem constituantur requiritur , est , ut sit in ea ordo et nexus , qui ad commune seu publicum ipsius bonum dirigatur : hoc est , ut sit in ea qui imperet , et qui ejus imperio pareant ; quibus etiàm potestas aut vis ad poenas reis infligendas consequitur. Quum enim individui seu particulares , ex propria et inordinata naturali cupiditate , ad bonum proprium tendant , posthabito aut etiàm everso plerumquè communi , dissolveretur societas , nisi haec in eam delicta impedirentur aut punirentur.

## SECUNDUM.

**LXXX.** Sequitur etiàm , omnes homines , ad

quascumque societas particulares, respublicas seu status pertineant, et cujuscumque etiam sint in iis conditionis aut dignitatis, societatis humanae, generatim sumptae, subditos et membra esse: sub uno summo imperante et capite omnium, Deo; ad ejusdemque commune bonum promovendum, communis lege, hoc est, naturali, teneri. Haec autem est praecipua dissimilitudo, quae societatibus particularibus cum hac generali humana intercedit: quod in illis omnia fere sensibus objiciuntur et visibiliter apparent: summus imperans, leges, tribunalia, judicia, poenae; quasi humanae institutionis in particulari mutationibusque idcirco obnoxiae: in hac, quae Deum habet auctorem, effectus tantummodo nostris oculis perpetuo et immutabiliter subjiciuntur; ut per eos sempiternae virtutis primam omnium Causam agnoscamus. Suspicimus enim societatum particularium sive regnorum initia, progressus, incrementa, defectiones, fines; societatem vero hominum generalem, seu eorumdem politicum statum, invariabilem permanere, et in dies potius civilizatione augeri. Et quamquam iidem homines libertatem omnimodam semper expetierint, a suisque consociis, hoc est, a propriis principibus fuerint assidue tirannice subjugati et oppressi, nunquam tamen ad statum illum

pristinum, quem vocant *aequalitatis et libertatis*, redire decreverunt. *¶ Cùr autem?* — Quia nimirū talis status non est nisi rebellium figmentum; publica verò societas et subjectio multorum alicui imperanti, seu status politicus naturalis est, et à Deo ipso apud homines immediatè et invariabiliter institutus.

## TERTIUM.

LXXXI. Omnes ergo principes et status, tanquam societatis humanae, generatim sumptae, membra et partes, tenentur impedire et punire ea delicta, quae genericae eorumdem societatis constitutioni opponuntur; eo quod illa communia sint mala. Quinque talia sint statuum quorumcumque publicae perturbationes et rebelliones, nec alia plerumque adsit ad ea compescenda potestas aut gladius, quam belli, omnes principes et respublicae tenentur alias summos imperantes juvare adversus sui status perturbatores et rebelles; eisque, quamquam, ob criminis consummationem, nationis aut gentis, sub proprio jām regimine constitutae, nomen assumant, bellum indicere. Neque hanc generalem et naturalem omnium obligationem tollere possunt causae aut rationes individuae et particulares: quae ad id tantum valere

debent, ut tempus, modum et ordinem rei exequendae designent. Unde non est in eo casu alia causa belli indicti aut indicendi quaerenda; sed cur ita potius ab omnibus non fiat, erunt rationes aut excusationes, si quae afferantur, discussiendae.

## QUARTUM.

LXXXII. Deinde, quum societatis publicae seu civilis hominis, cuius naturalis status sit aequalitatis et libertatis, ejusdem hominis institutio aut adinventio à scriptoribus juris naturae ac gentium fuerit hucusque communiter receptus error, aut errori saltem obnoxia sententia, quemadmodum in primo capite, tomī primi, nostri opusculi: *Origen de los errores revolucionarios*, in Ignatio Schwarz, Francisco Finetti, Heineccio, Werenko, comite Swiecicki, Jo. Baptista Almici, aliisque notavimus, quorum pleraque opera in manibus studiosae juventutis versantur, nihil tam ad pacem tranquillitatemque statuum servandam magis accommodatum et penè necessarium est, quam illius perspicuam impugnationem huic proponere; signatis etiam scriptorum locis, in quibus ejusdem, quamquam minima, significatio inveniatur. Idecō, quum Tractatum de Religione Ludovici Baylli, scriptoris caeteroqui, ut suprà diximus, paci-

reipublicae addictissimi, anno elapso, 1830, in Valentina Academia pro munere auditoribus legeremus, explicandam aut emendandam curavimus, inter alia, probationem quartam, Propositionis tertiae, Capitis primi, Primae partis, in qua, ad statuendum Dei cultum publicum, hanc rationem assumit. *Homines rerum civilium causa in societatem coalescunt et congregantur, leges sanciunt, magistratus eligunt, qui rebus civilibus invigilent. Ergo meliori jure Religionis gratia debent sic sese gerere, cultumque publicum instituere: quae tamen visa nobis fuit prorsus falsa.* Non enim sunt homines, qui rerum civilium causa, aut quia sic bonum visum est eis, in societatem coalescunt; sed quia Deus à principio, ut tota hac Dissertatione demonstrare conati sumus, eos in societatem constituit, legemque naturalem, ad publicam in ea conversationem servandam, praescripsit.

LXXXIII. Hanc eamdem erroris occasionem aut falsam doctrinam, quam in philosophia etiā morali Francisci Jacquierii emendandam putamus, in recentioribus publicistis, Spedaliero, et Zallingero solidè ac eruditè impugnavit P. Joachīnus Ventura, Ordinis Cl. Reg. Theatinorum (in Commentariis *De Jure publico ecclesiastico*, Romæ editis, apud

Franciscum Bourlié, anno 1826; ejusdem sacrae studiorum Congregationis judicio et censurae tunc adhuc subjiciendis). Et igitur ejus doctrina, bono publico ante omnia spectato, illustrata tunc fuisset ac propagata! Non fuissent fortè Italiae populi adeò ad rebelliones cominationesque, quae postea emerserunt, et quorum semima absdubio adhuc in animis multorum occlusa latent, comparati. Placet transcribere hic ad litteram, quae tunc hæc de re præclarus auctor scribebat, ut prudentiores nunc, alieno saltem periculo, et nos efficiamur.

LXXXIV. *Spedalierius* (ajebat ille, tom. I, pag. 94,) tempore, in quo non nisi de hominis obligationibus disserere debuerat, de hominis juribus pertractare aggressus, cum Rousseavio aliisque sui saeculi sephistis tacita quadam transactione inita, omnes penè eorum philosophicas et politicas opiniones sustinuit; dummodo illi catholicam admitterent religionem. Quarè, contra errores, in Gibbonio et Frereto refutandis, fortis, contra insanas præjudicatasque saeculi politicas opiniones debilis omnino inventus est; quumque ejus fides nulli jure suspecta esse possit, majus detrimentum, Romæ potissimum, quam Rousseavius ipse sub politico respectu, attulisse, experientia edocens, affirmare non dubito.

*Ibi incauta et ignara juventus omnes haurit  
praeposteras opiniones, de societatis origine, de  
potestatis natura, quae toties ordinem publi-  
cum conturbarunt. Rouseavii enim, Hobbesii  
aliorumque sequutus vestigia, statum silvati-  
cum purae naturae statum noncupavit. Status  
purae naturae, ait ille, modus existendi esset, in  
quo homines, unius ab alio sejuncti, viverent;  
aut simili viverent, sed ut *casus* ferret, ab  
omni prorsus soluti foedere, et unusquisque  
sibi unicè vacans. Hic status purae naturae di-  
citur, quia in eo *obligationibus* tantum natu-  
ralibus subjicerentur. Spedalieri, Dritti de  
l'uomo, cap. 7, §. 2.*

LXXXV. De Zallingero verò, post merito  
debellatum hac in parte politicum ejus sistema,  
(tom. I, in Append. ad cap. III, §. XV,  
pag. 174,), sapienter aequa ac prudenter rem  
acu tangens, concludit. *Quum verò in hujusmò-  
di theoriis et principiis de origine societatis,  
de civitatis ortu, de imperii natura ejusque  
formis, nostris etiàm temporibus, erudiantur  
adolescentes; quum illud jus naturae et gen-  
tium potissimum in honore sit, quod rebellio-  
nis omnia semina continet, quodque tacita  
sed infensissima contra omnem principatum  
conjuratio dici potest; mirari certè minimè  
deberemus, quod adeò insolens omnisque vel*

*imperii vel fraeni impatiens juventus ubique  
penè inveniatur, quod novae in dies conjuratio-  
nes et tumultus erumpant, quod dimidia hu-  
mani generis pars alteram gubernare studeat;  
quin tamen, tanto administrorum concursu  
et auxilio, ulla pax, ulla securitas, ullus  
ordo, ulla legum et societatis stabilitas con-  
stitui usque adhuc potuerit. Non enim pecunia  
et bellicis tormentis, sed principiis, doctrinis  
et moribus omnis respublica omnisque ordo  
stare consuevit; atque de principiis potissi-  
mum doctrinisque, individualem superbiam  
faventibus, quae in Philosophiae et naturalis  
Jurisprudentiae scholis, bona prorsus fide,  
tradita, deinde ad omnis religionis omnisque  
imperii contemptum incautoram mentes pa-  
latim adducunt, queri cum Poeta possumus:*

*Hoc fonte derivata clades,  
In patriam populumque fluxit.*

#### QUINTUM.

LXXXVI. Tanti tamen hujus viri venia, et  
ut errores rebellium aut ordinis publici, qui in  
Europa vigent, perturbatorum, funditus et magis  
radicibus evellantur, ipsa societatis publicae di-  
vina institutio, quae ejusdem politicae theoriae  
aut sistematis, aequae ac nostri, praecipuus

scopus est, videtur mihi strictius ac pressius, quam ille facit, firmando. Id autem assequemur, si statum primitivae familiae, ex qua universum genus humanum manavit, non dicatur *pure domesticus*: sed societatis etiam simul publicae seu *politicus*; quamquam ex minimo tunc adhuc numero civium instructus. Ita ut status publicae societatis non solum sit status homini naturalis in quantum est status roboris et complementi; sed in quantum est etiam *nativus*, *primus*, *primitivus*, *primordialis*, et a principio a Deo inter homines institutus: cui opposita est, non solum omnium rebellium, sed et Bonaldii, hujusque etiam, praestantissimi alioqui, scriptoris, opinio. Et re quidem vera sic ait: *Status* (tom. I, cap. III, pag. 85, lin. 13, cit. ed.) *in quo ens nascitur, dicitur propriè nativus; status vero ad quem tendit, dicitur et est sanè status naturalis.* *Status nativus, est status infirmitatis, imperfectionis, defectionis, defectus.* *Naturalis vero est status perfectionis, roboris et complementi.*

*Arbor, ut Bonaldii exemplo utar* (Bon. Legislat. primit. tom. I,), *in semine, homo in infanti incipit. Semen et infans: ecce status nativus. Ast arbor ad maturitatem, homo ad virilitatem pervenit: ecce status naturalis....*

*Status societatis pure domesticus, fuit*

*porrò status primitivae familiae, ex qua universum humanum genus manavit; et est quoque status illius familae, quae, vel casu aliquo, vel consilio, ab aliis familiis vel à publica aliqua societate sejuncta, in aliqua orbis terrarum regione consistit.*

*Familia haec, sicut primitiva hominum familia, dummodò nullo destruatur casu, impeditri nequit, quominus in familias crescat, et, lapsu temporis, societas publica evadat. Quare status purè domesticus est status per se transiens; status publicus tantum permianens est.... et pag. 89. Et revera cum primum homines dividi coeperunt, ut, juxta Numinis imperium, terram replerent, non per familias quidem, sed per nationes divisi sunt. Cain enim tantam nepotum suorum multitudinem secum adduxit, ut urbem Henochiam primus condere potuerit.*

*Altera verò populorum post diluvium dispersio sub ductu nepotum Noë, populorum, minimè verò familiarum fuit. Nam de populis ab unoquoque Noë nepotum procedentibus ante turris aedificationem, Scriptura loquitur. Et revera sub ipsa penè dispersione, Noë nepotes tantum unusquisque familiarum sibi subjectarum numerum habuisse dicuntur, ut regna et imperia condere potuerint.... Hactenùs ille.*

LXXXVII. Verumtamen clarum est, valde diversum esse statum, in quo nunc homo nascitur, ab eo in quo primus homo à principio à Deo creatus est. *Res* (ait D. Thomas, I part., quaest. XCIV, art. 3,) *primitus à Deo institutae sunt, non solum ut in se ipsis essent, sed etiā ut essent aliorum principia: ideo productae sunt in statu perfecto, in quo possent esse principia aliorum.* Homo autem potest esse principium alterius, non solum per generationem corporalem, sed etiā per instructionem et gubernationem. Et ideo sicut primus homo institutus est in statu perfecto quantum ad corpus, ut statim posset generare, ita etiā institutus est in statu perfecto quantum ad animam, ut statim posset alios instruere ac gubernare. Reipsa igitur instruxit alios et publicè gubernavit, optimique politici regiminis regulas ac conditiones eis prescrispsit; ne in vanum tantam scientiae et prudentiae excellentiam recepisse videretur: cf. ut ex tunc iam impleret, quod scripturus erat Petrus Ap. I, IV, v. 10. *Unusquisque sicut accepit gratiam, in alterutrum illam administrantes, sicut boni dispensatores multiforis gratiae Dei.* Neque ad rem facit exemplum Bonaldii, quod hic auctor etiā amplectitur, arborem in semine, hominemque in infanti

incipere; ex eo etiā quod, quum originem societatis inquirimus, ubi moralis scientia exurget, non id quod est necessarium et ad phisicam consequens constitutionem, sed quod ex ratione, electione et voluntate pendet, debemus assumere. Semen autem ad arboris, et infans ad viri statum, non electione et voluntate, sed necessario et phisicè certissimè, nisi moriantur, assurgunt. Unde et parùm commodi hujus rei discussioni videtur afferre distinctio status hominis in transeuntem et permanentem; maximè, quum status, ut plurimum, quid stabile et permanens ex se significet.

LXXXVIII. Falsum itèm nobis videtur, homines primum, ut juxta Numinis imperium terram replerent, per nationes et non per familias divisos fuisse. Divisi namque fuerunt per familias: quae, quum ante divisionem non fuissent nisi familiae unius ejusdemque status, nationis aut populi, per divisionem ac dispersionem distincti ac diversi status, nationes aut populi evasere. Et hoc est, quod expressè habet Scriptura, ubi dicit Dominus ante dispersionem: Gen. XI, v. 6: *Ecce unus est populus, et unum labium omnibus.* Quasi diceret: generis humani propagationi, quam decrevimus et prescripsimus, convenit ejusdem dispersio, seu unius status, nationis aut populi in multos divisio; quam isti tamen homines, nimio societatis,

in qua versantur, amore, aut desertarum in-  
colendarum regionum timore affecti, repugnant  
exequi. Venite igitur, et, pacti foederis me-  
mores misericordiaque erga ipsos commoti,  
confundamus linguas eorum, ut libenter id, si-  
mul ac certò, adimpleant. Näm quod capite  
decimo anteriori populos ac nationes jām di-  
stinctas commemoret Moyses, per *prolepsim*  
sive anticipationem id scriptum esse, suprà jām  
diximus. Concedere insuper, statum primitivae  
hominum familiae, aut ejus etiām familiae,  
quae vel casu aliquo, vel consilio, ab aliis fa-  
miliis vel à publica aliqua societate sejuncta,  
in aliqua orbis terrarum regione consistit, esse  
*purè domesticum*, et, non nisi lapsu temporis  
evadere societatem publicam aut statum *civilem*,  
est, ansam præbtere rebellibus aut publicis  
statuum perturbatoribus, ut dicant, benè qui-  
dem haec se habere; sed tamen certum esse,  
hunc transitum seu progressum status *purè do-*  
*mestici* in statum *publicum* seu *civilem* non  
fuisse nisi opus aut consilium hominum: qui,  
familiam ante constituentes et paterno regimi-  
ne gubernati, supremam publicamque potesta-  
tem sibi elegerunt, totamque auctoritatem vel  
uni tantum vel pluribus detulerunt; seu ut alio-  
rum, qui incantè etiām de hac re loquuntur,  
verbis utar, consilium id fuisse hominum, qui

quum vidissent numerum individuorum suae speciei augeri, nec sibi sufficere existimantes simplicitatem primitivarum suarum relationum socialium, perficiendam suam naturam judicarunt, egeruntque, cum eo statu, quem nos nunc vocamus *politicum*. Quod est, gravissimam hanc fundamentalemque quaestionem confusam et indefinitam relinquere. Familia etiam particularis, quae postea, vel casu aliquo, vel consilio ab aliis familiis vel à publica aliqua societate sejungitur, si sine causa et injuria id faciat, societati seu statui, à quo defecit, subjecta permanere debet: quum princeps aut status seu patria aliquod jam jus suprà ipsam illuc usque acquisierint. Si verò, merito et justa interveniente causa, talis separatio fuerit ab ipsa effecta, evadit *simil* ipso facto societas publica, libertate politica, sicut et primitiva hominum familia, ab omnium Conditore donata. Neque ad statum publicam ac naturalem statuendam constitutionem, innitimus Rabbinorum traditioni de precepto 6º à Noacho Noachidis dato, constituendi magistratus et judices, de quo agit Maimonides, cap. 3º: quod nonnulla tamen apud haebreos valebat auctoritate; sed rectae tantum rationis lumini, et ipsi praeterea, quam prae oculis habemus, sacrae Scripturae. Quomodo enim, ut diximus, potuit non esse publica,

et omnium maximè , prima illa post diluvium humana societas , cui Dominus , immediatè et per se ipsum , loquutus est ; leges praescripsit ; aeternum quasi foedus cum ea pепigit , et quam paulò post , *ut terram repleret* , divisit in multas super faciem cunctarum regionum ? Quod si ex tunc vivere jam cooperunt homines in statu publicae societatis , gubinam , et quando , quaerimus iterum ab adversariis , viguit status publicus independentiae , aequalitatis et libertatis ? Fictitius est ergo talis status , quem tamen illi *naturalem* vocant : fictitiaeque simùl perturbatrices consequuntur , quas ex eo passim rebelles eliciunt .

LXXXIX. Reponent adhuc fortassè qui horum scriptorum litteram praecissè amplectuntur , nec hac nostra doctrinae politicae theoria perturbatorum perniciosas consequuntur , aut cavillationes excindi . Licet enim primitiva familia , inquit , ponatur societas domestica simùl et politica , utriusque tamen jurium separationem , quae postea facta fuit , et in praesenti existit , dubitari non posse , objicient publici perturbatores , quin hominum sit institutum : quo in eamdem , à qua tantoper abhorremus , politicae potestatis humanam adinventionem incidimus . Verum non animadvertisunt , qui haec ita disputant , aliud omnino esse , auctoritatem publicam

seu politicam instituere, et aliud valde diversum eam ad praxim reducere, ipsiusque diversa munia paucis aut multis, et his aut illis, committere. Prius illud Dei opus, et à generis humani quidem exordiis, fuisse, defendimus. Istud posterius ad hominum postcà arbitrium prudentiamque spectare fatemur: ità tamen ut, in iis rebuspublicis constituendis, legis naturalis rectaeque rationis documenta et ordinationes sequantur: in quo tantum casu, eorumdem institutiones legitimae sunt censendae. Hanc societatis theoriam quasi verisimiliorem, et ad praedictos evertendos errores accommodatiorem, in hac Dissertatione probare conati sumus. Si rem non attigimus, aut alias, novis adquisitis luminibus, meliora his adinvenerit, ea etiàm et nos ex nunc amplexamur. Non enim propriae tantum sententiae tenaciter adheremus; sed quandoù probabilior alia non adsit, quae hanc quaestionem gravissimam et communis societatis bono penè necessariam magis illustret.

## SEXTUM.

XC. Tandem, quum nihil apud homines sit legitimum, nisi quod legi naturali ac praedictae eorumdem primordiali societatis constitutioni sit consentaneum, ex doctrina, in

antecedenti dissertatione comprehensa et prae-  
scriptione, aestimandae erunt rationes, quibus,  
non modò subditorum, sed et summorum etiàm  
imperantium jura, et eorumdem politicae insti-  
tutiones ac placita legitima sint censenda. Ex  
praescriptione, inquam, quae cum praedicta le-  
ge divino naturali, à qua omnium hominum  
jura descendunt, conveniat. Memini, me quon-  
dam in animo habuisse, juris naturae ac genti-  
um quasdam institutiones scribere, ut in  
proemio primi tomī, praecepsati operis: *Origen*  
*de los errores revolucionarios*, lectori signifi-  
cavi: quod equidem ad exitum non perduxī.  
Insfirmitas valetudinis et aliae causae id ege-  
runt. Summàtim tamen, et per quam paucis,  
exponam hic, quaenam procùldubio fuisset ea-  
rumdem theoria: quod satis superque erit juris  
publici prudentioribus, quibus expendenda ac  
emendanda haec omnia nostra submittimus.

XCI. Principio igitur, praemissa subje-  
cti seu juris naturalis definitione, quod aliud  
certè non est, quam facultas, lumine naturae  
nota, propriis necessitatibus subveniendi per  
usum licitum mediorum, quae ad nos perti-  
neant: sive, ut alii dicunt, facultas propriam  
nostram naturam et existentiam conservandi et  
perficiendi, non aliam inter ipsum et, quod  
vocatur, jus gentium distinctionem intervenire

statuissem, quam quod istud, non ita proxime et necessario ut illud, continetur in primariis et universalioribus legis naturae principiis; et circa ea praetereat versatur maxime, quae ad mutua integrarum gentium aut nationum inter se officia spectant. Mox, ex proposito, et sub speciali titulo, egisse de natura hominis ejusque in hac vita beatitudine et perfectione naturali, quae in solo virtutis exercitio consistit: ejusque doctrina nonnullam fortasse lucem attulisset supradicata communem pseudo philosophorum boni publici vulgarem notionem. Deinde, legis naturalis natura ac definitione explanata, juris naturae non aliud fundamentum, radicem aut causam remotam designasset, quam divinam voluntatem seu legem Dei aeternam: proximam vero predictam legem naturalem, quae illius est in humana creatura participatio. Tunc, quarto capite, societatis publicae divinam institutionem, argumentis desumptis a sola ratione philosophorumque auctoritate, probassem. Quinto, id ipsum ex sacra Scriptura confirmassem: ex eaque, intellecta etiam juxta protestantium captum, qui multos in Europa sectatores habet, fictitiū demonstrassem statum naturalem hominis independentiae, aequalitatis et libertatis: rebellium ac perturbatorum praecipuum aut quasi unicum firmamentum. Nam, ut supradicata in

Dissertatione adduximus, si aliquando talis status in mundo viguisset, maximè fuisset à diluvio ad statuum, populorum seu regnorum mundi notam originem et distinctionem: quo tamen tempore homines, non solum societate publica non caruerunt, quin potius, nimio ejusdem societatis jàm constitutae amore allecti, rebellionem, duce Nimrodo, excitarunt; civitatemque ac turrim, cuius culmen ad coelum pertingeret, aedificare intenderunt. Sexto, primum hominis officium in lege naturali contentum, illud posuisse: qno tenetur homo suum Creatorem, Deum, ex creaturis agnoscere, dirigere, colere eique obedire; à quo toto coelo distare videntur recentium sophistarum conatus. Ibi, quamquam cum multis juris naturae ac gentium scriptoribus de societate non cognita aliquisque admissis erroribus, in meis scriptis perpetuo expostulem, non tamen inter eos retulissem, ut aliqui faciunt, conjunxisse illos juris naturalis ac legis naturalis notiones: quum haec duo, salva morum sana doctrina, separari nequeant. Septimo, ex Dei sanctitate et perfectione, societatisque humanae ab ipso institutae natura, officia deduxissem hominis, tūm erga se ipsum, tūm erga alios. Atque ita deinceps, de societatibus, conjugali, domestica, herili et adventitiis; de summa civili potestate ejusque juribus, tām

immanentibus quam transeuntibus; de bello; de dominio; de proprietate; de pactis, aliisque rebus, ad vitam humanam in societate juxta legis naturalis praescriptum foeliciter traducendam, pertinentibus, tot capita seu lectiones addidissem, quot ad res singulas necessaria aut opportuna putassem. Neque praetermississem, sive in principio, sive in fine, meum librum Europae principibus nuncupare, enixe eos deprecando, ut veram doctrinam in suis statibus promovere curent: utpote unicum ac necessarium ad communem omnium foelicitatem medium faciendam. Atque ut lux veritatis, tenebris errorum comparata, clarius eluceret, adnotaciones ad calcem textus apposuisse, sive ad singula capita singulas quoque addidissem Appendices, in quibus si cum suis auctoribus apparerent, et manifestae simul fierent causae sive elementa, unde ortum ducunt: idque praesertim praestare curassem in recentioribus scriptis, quae incautos aut impatos lectores excipere solent.

XCHI. Ante oculos et in manibus habeo hujus generis exemplar insigne. Editum est his diebus nostrae huic Valentiae, et vulgari lingua, hac de re opus, cui titulus: *El verdadero derecho natural. Obra necesaria á toda clase de gentes, por D. Braulio Foz*: quem, pravis studiis praeoccupatum, bona licet fide,

librum pessimum pervulgasse censeo. Non quidem omnem ejus doctrinam rejicio; sed ideam maximè fundamentalem, sive, ut vocant, *sistema* vel *theoriam*, quam ad jus naturae explanandum, suprà omnes scriptores qui de eo hucusque egerunt, sibi, veluti foelici casu, novatoris instar, invenisse blanditur. Eam sumit ab hac sententia seu propositione senatoris Desttuti-Traci, in sua Ideologia: *jura entis sensibilis seu sentientis ex suis proveniunt necessitatibus*: quam, veluti praeclarum inventum, narrat his verbis: *A este libro (scilicet, Ideologiae praefatae), debo yo mucho.... Y al llegar á aquellas palabras: los derechos del ser sensible nacen de sus necesidades, me sentí defendido de golpe, herido de esta idea. Me paro, leo una y otra vez esta inmortal proposicion, la examino, pienso en mi frustrado derecho natural, discurso, me aseguro mas y mas, corre mi pensamiento, vuelvo al principio, lo aplico á todos los estados del hombre, y he aquí que se descubre á mi vista un nuevo orden de cosas, un nuevo mundo iluminado de una luz soberana; de tal manera, que me pareció salir de una region de tinieblas á una region toda de luz, como si en medio de la noche, en un país desconocido, se levantase de repente el sol en el horizonte....*

Quam tamen propositionem falsam puto, socalisque ordinis subversivam. Quum enim necessitates producant desideria seu cupiditates non solum utiles et justas, sed plerumque noxias et injustas, quae opere adimpleri nequeunt sine summa injuria, non possunt ab eis ortum ducere vera naturalia jura. Oppositorum enim oppositae sunt rationes et causae.

XCHI. Nascitur hic error ex eo quod confundit hic scriptor naturalem aut phisicum instinctum cum verò naturali jure; undè et ab appetitu sive desiderio necessario illud emanare ait (pag. 79, tom. 1,) et non à Deo, quemadmodum lex naturalis à Deo procedit, ortum ducere, sed à sola hominis existentia, et neque ante, neque ab alio principio (itā pag. 82, n. 12 ejusdem tom.); legeque ipsa tandem prius et anterius esse (pag. 86, ad fin.): quae quidem omnia notissima sunt absurdā. Demonstrare nobis tamen totum id sibi persuadet, aliis futilibus omissis momentis, quae, ipsa à se data juris naturalis definitione (pag. 124, n. 20,), corrūnt, hoc solum nobis interrogando (pag. 108, n. 10,): *Dum homo siti laborat; quis ei praescribit ut bibat? Quia ratio à necitas?* — Rationem autem nos respondemus, si haec potatio humanus et deliberatus actus ponatur: quemadmodum poni ab ipso

auctore etiā debet, qui, ibidem, reflexionem ei tribuit et libertatem. Alioqui verum jus naturale haberet etiā homo potum sumendi in hoc casu, quamquā cognosceret, potationem illam morbum aut mortem sibi esse allaturam. Fictitium igitur, imaginarium, et sola hujus scriptoris illusione innixum est illud jus naturae, quod in hominibus, ante legem naturalem ab eaque sejunetur, ipse supponit. Unde ad ejus demonstrationem, et peregrina, et pugnatio assumere cogitur: veluti dūm ait (cap. 3, tom. 1, pag. 110, lin. 9,): ejus scientiam esse omnino phisicam: *Nuestra ciencia es toda fisica.* Quis enim unquam audivit, veri juris scientiam esse phisicam? Et paulò infra (in eadem pag., lin. 20.) *Naturam non respexisse omnes antiquos* (ante ipsum, scilicet), *in qua unicè reperitur veritas rationalium scientiarum* (*olvidados todos de la naturaleza, que es donde únicamente se halla la verdad de las ciencias de la Razon*). Ipsi, scilicet, idem forte sunt scientiae phisicae ac rationales.

XCIV. Video, et planè fateor, praedictam satis obviam animadversionem scriptori nostro non latuisse; concedit enim (infra tom. 1, cap. IV, n. 9, pag. 202, ed. Valent. an. 1832), *exactum* (hoc est propriam loquutionem), *fōre, dicere, jura injusta non esse jura; verūm*

*suppono, addit, omissa etiām hac admonitione, ita hoc intelligi.* ; Cūr ergo stātim jus suum naturale non discilit, et super aliud probabilius *sistema* seu māgis fixum verumque fundamentum illud ipsum superstruxit? ; Cūr amici sui Desttuti Ideologiam à se non abjecit, maximē cum nosset, continere eam errores, qui defendi nullo modo possunt, ut ibidem ait (pag. LIV Proem.)? Verūm referendum hoc puto, benevole lector, ad praejudicia studiorum, in quibus multi à librorum, quorum lectioni incumbunt, maximēque si novitatum amorem in eis inveniant, nimis aegrè sententia discedunt. Nascitur, ex aeducationis qualitate et conditione, in qua quorumdam auctorum iidem prae caeteris amorem ebibunt, indēque ad judicandum feruntur, prout sunt affecti. Hic auctor, ut patet, gallorum, quos revolutio evomuit, scripta evolvere amat, ex iisque fidenter veritatem educere, etiām in rebus moralibus, sibi pollicetur. Mihi, planè fatior, ex illis vix illa placent; communique nationis nostrae sensui adbaereo, quae, sanctorum piorumque scriptorum doctrinam semper tenendo, saniorem in his rebus sententiam tenere arbitratur. Indē enim sit, ut variarum sententiarum, quae juri naturali, benē intellecto, sunt prorsū consentaneae, ab illis non capiatur sensus. Tres tantum ex his

attingam, graviorem operis impugnationem jurisprudentium muneri relinquendo.

XCV. Sanè et praedicta ratione neque nostram de divina societatis publicae institutione sententiam adversus rebelles ac statuum perturbatores (cui licet toto cap. I, tit. II, pag. 126, tom. 1. *De hominis sociabilitate*, accedere videatur, oppositam tamen ejus menti dicent infixam, qui varia operis loca attentè perpendant: ut tomī 1, pag. 85 ad fin.; tomī 2, pag. 36, n. 23; pag. 51, n. 16; pag. 62, n. 27; pag. 67, n. 5; pag. 81, n. 5, et pag. 180, n. 7 ad fin.: immò et super pactum, sive tacitum sive expressum, eamdem societatem fundatam censem, pag. 76, n. 13), neque Divi Thomae doctrinam, dicentis: *distinctionem possessio-*  
*num et servitudinem non esse inducta à natura,*  
*sed per hominum rationem ad utilitatem hu-*  
*manae vitae* (cui, non omnino adhaerendo, ait:  
 pag. 199, tomī secundi: *A los Santos Dios no*  
*solia revelarles nada de lo que pertenece á las*  
*curiosidades de la filosofia: en eso los dejó*  
*hombres ordinarios; ni tienen mas autoridad*  
*que los meros filósofos, es decir, que la fuer-*  
*za y valor de sus razones &c.:* quasi Divi  
 Thomae doctrina pro revelata à suis discipulis  
 habeatur, et origo juris proprietatis, à quo fere  
 omnia pendent societatis jura, ad philosophiae

euriositates spectaret), neque illam aliam Juris Canonici de matrimonio rato et non consummato (de qua loquitur et miratur, pag. 261, tom. 2, tit. 5, cap. 3, n. 7, tantam ignorantiam nostris patribus adfuisse: ; *Tanta ignorancia cupo en nuestros padres!*), eum existimo intellexisse.

XCVI. Non primam: quum enim praecipuus scopus nostrae doctrinae sit, politicas perturbationes ac rebelliones impedire, quae ab erroribus circà civilis societatis et potestatis originem necessario oriuntur, non sufficit, hominem sociabilem affirmare; immò et nec juris naturalis principium cum Puffendorfio à socialitate deducere: quia, etiàm in hac sententia, homines, quantùmvis necessitatum ac utilitatem incitamentis ad societatem publicam in eundam adigantr, ipsi tamen sunt, qui in eam voluntariè coalescunt et congregantur: ad ejusdemque propterea regiminis formam mutandam jus, et quidem imprescriptibile, habere creduntur, unde predictae perturbationes emanant. Sed oportet, tām societatis, quam supremae ejusdem Potestatis originem altius, hoc est, à Deo ipso repeter: quo nulla hominum jura nec providentiae pertingunt. Dicendum ergo putamus, legem naturalem primi hominis menti à Deo, quum adhuc solus esset, infusam, verbique

ministerio, ad omnes ejus posteros deinceps transmissam, societatem publicam praescribere: quae postquam in prima familia incepit, aucta dein fuit aliis familiis ex ea procedentibus; non quidem liberè eidem adhaerentibus, sed quia, tam ex predicta lege divino-naturali, quam ex positiva humana, quae ratio et voluntas erat communis eorum Patriarchae, Rectoris aut Principis: Adami, scilicet, primùm, ac posteà Noachi, his tanquam summis Imperantibus subjectae permanere debuerunt, et permaneserunt: donèc à Noachi post diluvium ordinatione, qui ex Dei voluntate primitiae illius in multas publicas societas seu status divisionem noachidis denunciabit, Niueodus recessit, rebellionem excitando, qua primus rex seu tirannus potius in regione Senaar, qua remansit, nuncupatus est.

XCVII. Non secundam: quia non satis convenienter distinguit in ejus explicatione usum à proprietate. Neque verum est, ut putat (pag. 324. et ult. tom. 1.), loqui D. Thomam in ea tantum hypothesi, qua homines res, quae objectum sunt proprietatis, nondum occupassent. D. Thomas enim non est in hac re ambiguus nec obscurus. Constantè tenet, et pro vera habenda est ejus haec sententia, hominem naturale dominium rerum exteriorum habere, in quantum

per rationem et voluntatem potest iis uti ad suam utilitatem, quasi propter se factis. Deus namque, cuius est terra et plenitudo ejus, ei eas donavit, ut expresse habet sacra Scriptura, Gen. cap. 1, v. 29, ubi ait Dominus: *Ecce dedi vobis omnem herbam afferentem semen super terram, et universa ligna, quae habent in semetipsis sementem generis sui, ut sint vobis in escam.* Et cap. IX, v. 3. *Omne quod movetur et vivit, erit vobis in cibum: quasi olera virentia tradidi vobis omnia.* Sed aliud est rebus indiscretè aut in communi uti ad sustentationem, aliud eas ad possessionem propriam occupare. Prius est de jure naturae, ut docet idem sanctus Doctor, et patet: nec tamen posterius, hoc est, *proprietas possessionum est contra jus naturale, sed juri naturali*, ait, *superadditur per adinventionem rationis humanae* (2.<sup>a</sup> 2.<sup>ae</sup> Quaes. 66, art. 2, ad 1.). Ratio est, quia, quum perfectius sit uti tantum rebus juxta necessitatem, et, ea salva, sine exclusione quidem aliorum ab usu earumdem, quae proprietatem consequitur, jus naturae, quod in perfectissima lege divino-naturali fundatur, communitatem certè possessionum primo statuit, et ut quid perfectius subindicat; licet, actualibus et imperfectis, ut plurimum, hominis inclinationibus consideratis, ad curam rerum

fovendam pacemque in societate servandam, non modò ut licitam, sed et veluti necessariam declarat earumdem exteriorum rerum proprietatem. Et haec est praedicta sancti Doctoris sententia: *distinctionem possessionum non esse inductam à natura, sed per hominum rationem ad utilitatem vitae humanae.*

XCVIII. Sed neque rationem tertiae indicatae sententiae benè hunc scriptorem arbitror perpendisse. Dei siquidèm Ecclesia matrimonium tanquam rem licitam et bonam probat ac benedicit; scit tamen, à Spiritu Sancto edeta, meliorem esse continentiae ac religionis statum, juxta dictum illud Apostoli, quod qui matrimonio jungit virginem suam benè facit, qui verò non jungit, melius facit: quo idem Spiritus, qui, ubi vult, spirat, vocat et dicit sua gratia eos; qui sibi placent. Ut autem expeditior ac latior ad hunc majoris perfectionis statum, in quantùm fieri possit, pateat aditus: et matrimonium ratum sed non consummatum, Traditioni innixa, professione religiosa dissolvi, in Concilio Tridentino decrevit; et legem libertatis illud consummandi intrà bimestre Jus Canonicum concedit conjugibus: quibus positis, non nisi sub his conditionibus catholici matrimonii contrahunt. *¶ Ubi ergo locus tam turpi ignorantiae, qua hic scriptor Patres nostros hac*

in re laborasse miratur? Admiratio equidem mihi haec videtur impia; nec dubito, quin eam pejus aliquid sapere alii fortassè censemunt. Difficultates verò, quae ex his legibus oriri insuper ipse putat, in quacumque Summa morali solutae inveniuntur.

**XCIX.** Satis. Haec pauca ex hoc opere indicasse sufficiat, ut moralis ac politicae nostrae scientiae electioni ac judicio, quod à majoribus accepimus, et, quibusdam ideologis novatoribus paucis exceptis, unus omnium est, magis ac magis in dies tribuamus, illorumque scripta cautè semper à nobis legantur.

## ERRATA.

---

Pag.	lin.	scriptum.	legendum.
3...	5..	phisicae.....	<i>phisiçè</i> .....
Ibid.	8..	metaphisicae..	<i>metaphisiçè</i> .....
9...	16..	prima.....	<i>primam</i> .....
10...	18..	Verùm.....	<i>Verum</i> .....
11...	12..	alio.....	<i>alii</i> .....
42...	16..	gladins.....	<i>gladium</i> .....
43...	13..	¿ Vocarini.....	<i>¿ Vocarinè</i> .....
58...	11..	Deo ipso.....	<i>Deo ipsi</i> .....
70...	8..	dominibus.....	<i>domibus</i> .....
74...	7..	nimis.....	<i>minus</i> .....
85...	4..	quam.....	<i>cujus discussionem</i> .
106.	16..	incautoram....	<i>incautorum</i> .....


---


MARZO 1833.


---

Es esta obra una propiedad del Real Convento de Predicadores de Valencia, puesta bajo la protección de las leyes.









Univers  
Bibli



3

3

3

3

3

3

3

3

3

3

3

3

3

3

3

3

3

3

3

3

3

3

3

3

3

3

3

3